

焦太史編輯國朝獻徵錄

焦太史編輯國朝獻徵錄卷之六十九目錄

南京大理寺

卿

湯宗

龔永吉

夏時正

宋欽

吳道宏

章格

傅習

林茂達

孟洋

李顯

王湘

少卿

呂升

黃羣

評事

夏鏞

關中劉必達

全校

吳興茅元儀

錢塘徐象檣刻

目錄終

焦太史編輯國朝獻徵錄卷之六十九

南京大理寺

卿

南京大理寺卿湯宗傳

湯宗字正傳浙江平陽縣人初由太學生擢河南按察僉事改北平後陞山東按察使坐事左遷刑部郎中永樂初擢蘇州知府時郡內連遭水患細民流離道租百餘萬石無所出宗不忍迫促諭富民出米代輸富民知其能愛民皆從其令不三月逋負悉完又坐事左遷知祿州用右春坊大學士黃淮薦召還授

大理寺丞時外夷貢使病死使者從人謂醫署之獄
成宗則嘆曰夷人於醫素無仇怨寧有故殺之理
卒辨其誣明年河南水患民多流徙 仁宗皇帝在
東宮命宗往賑之比還命署戶部主事未幾坐累繫
獄者十餘年 仁宗蒞祚復大理丞俄進左少卿陞
南京大理寺卿 上嗣位命清理戎籍于山東時天
久不雨宗極陳民間饑饉疲困之狀即日召還勅有
司免租稅蠲徭役罷不急之務宣德二年正月卒年
六十有三計聞遣官賜祭命有司治葬

南京大理寺卿龔永吉傳

龔永吉字天民父泰以都給事中死建文之難語具忠節錄永吉領鄉薦宣德丙午授職方主事清慎有聲管扈 駕征樂安正統改元丙辰春二月陞武選郎中秋九月被誣謫戍平涼二年丁巳春二月北虜犯邊兵部尚書王公薦公可用詔驛騎取之時副總兵都督趙公安兵部侍郎柴公車將兵出涼州以公爲佐軍執敵而還公之籌策居多夏六月復任當在平涼時以傳浹於家逾三年公弗及守制既還乞終喪不許九年甲子詔靖遠伯王公驥討麓川竊得

巡延綏寧夏莊涼甘肅等處以公爲佐奏功獻捷十四年己巳復詔靖遠伯將兵往龍川緬甸孟養等處征剿苗蠻經畫一委於公運籌決勝參贊惟勤班師行賞冬十月擢大理少卿天順改元春三月陞兵部右侍郎夏六月改南京禮部秋八月改南京大理寺卿時有冤獄休寧縣土豪孫志靜謀殺細民項仕和而奪其妻事覺賄執獄者脫其罪都察院送寺審錄公疑而置之及晚歸過太平堤忽一鵝止肩輿下揮之弗去公指謂鵝曰若有冤可隨我至門及至則鵝不見矣公曰此非項仕和之冤耶翌日閱案果疑逮

駁回會都御史蕭公維禎差官往覈其事實孫志靜
謀也成化乙酉冬十二月上疏乞骸得免乃買舟東
歸琴書之外無餘物公平生厚於待人薄於奉已倦
倦以保民愛君爲心永嘉章恭毅公嘗題其墓有生
既無慚死亦何愧之語憶可謂名言也已

南京大理寺卿夏公時正墓志銘

王鏊

成化庚寅南京大理寺卿夏公致仕歸仁和後二十有九年爲弘治己未卒於家春秋八十有八其子雖澤教諭某來請銘曰公命也不得辭公諱時正字季爵夏姓公生有異質讀書日記千言登乙丑進士第五人授刑部河南司主事進郎中命理福建等處重獄時上杭民饑盜且起不及以聞亟發倉賑給人比漢汲黯天順初進大理寺丞以母老乞致仕不許請近地便養改南京大理進少卿成化初改太常已又遷南京大理寺卿被命巡視江西黜貪濁者二百二

十餘人革濫徭理庾監放免無名之稅十餘萬石勸
民出粟七十餘萬賑饑民二十三萬戶修築南門城
堤城賴復完長河洞民叛服不常公單車詣桑穴曉
以威德衆感泣歸順復䟽時弊二十事以開當道有
不悅者逸三上章乞去得報遂行歸杭僦屋城陰之
得勝里左右經史日以著述爲事藩司爲建西湖書
院於孤山復建和靖巢居閣以居公故冢宰華亭錢
公作海內耆英會公其一也夏氏世爲隴右人唐上
柱國封濟國公諱魯才始遷潮東慈溪之德門鄉諱
千秋者始遷定海考諱誠贈奉政大夫刑部郎中追

遷杭州仁和之三峰公娶沈氏封夫人所著有餘留
彙三十五卷太常志十卷三禮儀略舉要各十卷澤
水考十卷杭州志六十三卷禹貢詳節一卷蓋晚而
好春秋曰聖經微旨諸儒亂之也乃爲春秋辯疑未
脫藁而卒

南京大理寺卿宋欽傳

實錄

南京大理寺卿宋欽字克敬陝西乾州人正統十年進士授大理寺評事歷陞福建按察司僉事四川副使征大場賊有功受金織衣銀牌之賜轉河南按察使尋擢都察院右僉都御史巡撫貴州陞南京大理寺卿累疏乞致仕許之加資政大夫弘治十二年七月卒贈刑部尚書賜祭葬如例欽居官以廉慎稱精于法比其乞休輒凡十餘上始終之際有可觀者

大理寺卿吳道宏傳

實錄

吳道宏字文博四川宜賓縣人天順元年進士授南京太常寺博士上疏論東南事併劾大臣之不職者遷授監察御史巡按襄荊等府時荆襄流民復聚爲患議者多欲驅逐道宏言流民樂彼沃土逐之復來不如因而撫集順且有功于是建議行都司衛府州縣以安集軍民而籍其流散者特陞大理寺右少卿撫治其地以憂去服闋改南京大理右少卿尋陞本寺卿弘治三年言者論其庸碌因自乞致仕十五年九月卒賜祭葬如例

南京大理寺卿章公格墓志銘

公姓章氏諱格字韶鳳別號戒菴其先浙之樂清人
宋文簡公得象之裔高祖興達始遷蘇之常熟曾祖
日散隱德弗耀祖煥文贈都察院右副都御史祖母
唐氏贈淑人考孟端仕爲監察御史直聲聞天下贈
都察院右副都御史母唐氏贈淑人公少承家教治
毛詩攻舉業日與諸昆仲自相切磋年十九領正統
甲子應天府鄉薦二十六登景泰辛未進士歷南京
工部主事南京刑部郎中廣東按察司副使雲南按
察使福建布政司左布政使南京光祿寺卿南京大

理寺卿凡七轉其爲刑部也當塗貧民三十餘人竊
官廬新所司以強劫論公改從輕典惡少與虎素爲
民害公寘諸重法其爲副使巡視海道也琉球國人
貿易隣境風飄至香山武臣欲盡戮之以爲功公爲
之辯奏還其質而遣之其爲按察使也請立王忠文
公祠歲時致祭撫強夷暴爲弄俾遠方寧謐其爲布
政使也擒上杭叛賊之渠魁減漳泉賦歛之繁重其
爲光祿寺也除內臣擅派之物料其爲大理也平反
刑獄不可殫述凡所歷在在有聲績此特其槩耳公
爲人心地坦夷性度寬厚不爲崖岸斬絕之行以沽

譽釣名而人皆知其爲仁人君子平生未嘗言人過
失處寮友開心見誠人以是咸愛敬之晚年致政閑
居不與家事恒登山泛水以自適蓋徜徉林下者將
十年公始終福屬可謂備矣生于宣德丙午七月四
日終于弘治乙丑七月七日年八十 朝廷命翰林
爲文諭祭工部遣官管塋

南京大理寺卿傅公習墓志銘

嚴嵩

公以都察院右副都御史巡撫滇南既被命改南京大理卿當行矣尋伺武定土酋倡亂抄掠諸部圍逼會城勢張甚公曰吾可諉而去乎是時公已被疾乃力疾巡城發部兵討賊賊尋破優詔嘉獎有白金綺幣寶銀之賜公經理條畫起居無時既行至鎮遠則疾甚弗起嘉靖戊子五月二十一日也年六十有七計聞詔有司營梓事遣官諭祭如制公少刻苦爲學家貧寄食京師以羽林戎籍補順天府學生領京闈鄉薦丙辰登進士授大理評事詳獻不私遷寺副繼

遷寺正奉命慮囚于河南再蒞湖廣多所平反地瑾
擅政嘗欲脫人于罪公持弗可瑾怒中以他事逮公
繫詔獄請浙江布政司理問已而復逮至京禍出臣
測或勸可賄免者公委順守正一無所移人咸危然
然公居官素防檢審無可招撫瑾終莫能害也擢山
西按察僉事陝西兵備副使調廣西右江有平賊功
進俸一級陞貴州叅政按察使廣西右布政使雲南
左布政使拜都憲即撫其地公所爲政拊罷瘵之氓
按貪暴之吏前後數任皆在邊方勞効畢著比及內
召而公弗祿矣公諱習字本學姓傅氏南昌進賢人

曾祖諱原益仕爲廣西太平知府祖諱德威父諱明
昌以公初命贈爲大理評事嗚呼公起諸生徒步宦
學屢踐艱棘終以村立顯庸千時庶幾堅忍果毅致
遠受大者夫乃論次行事而銘之

南京大理寺卿林公茂達傳

柯維騏

林茂達字孚可號翠庭烏山人殿元環姪孫淮安同知思承之子母黃夢異人手授孝弟忠信禮義廉耻八字箴而生既長入庠作文務去陳言顧講場屋餘二紀弘治壬戌登進士授行人拜監察御史出巡畿甸文武無狀吏或黜或劾置諸辟所部肅然凡持論存大體耻奉宰相旨以躡美官擢湖廣按察副使不為勢力撓法擢貴州左叅政往鎮西部西人以寧擒討群寇有勞錫資甚渥諸夷鈔略海西烏撒逼城堡戒官屬周為之備夷處溪以渴城人則因上流鑿石

爲浦地中行二里許或人利汲號林公井或大驚弗
敢過尋擢雲南按察使以繼母憂去嘉靖壬午補四
川連署左右布政使過糧致一石率費二石輸者恒
至蕩產則計儲遠近費多寡融派混徵分倉彙解督
以官民庸弗困解京歲需例有火耗舊爲州縣訖沒
解者逮繫以死則出餘金以代案宿弊而嚴禁之其
庶民類此丙戌再疏引年陞都察院右副都御史致
仕已凡復起南京大理寺卿懇疏以辭允之丙申歲
年踰八十有司奉明堂禮戒 詔備禮存問給與夫
月米海內僅有也茂遷歷官廉白儉約在蜀歲久惟

以二僕從家居凡十五年甘貧自守與耆舊爲逸老
會登覽吟詠爲樂所積俸餘作祖祠作待恩祠田增
數畝僅僅給家衆衣食舊廬狹隘莫之能拓與兄茂
春同居老彌篤與人言無矯飾或施恩於人未嘗令
知即其素履蓋符寤生之夢云享年八十六卒

南京大理寺卿信陽孟公洋墓志銘

歲嵩

公生於河南年二十二舉進士爲行人時公之內弟
何子仲默方有俊名與友李獻吉王千衡崔子鍾田
動甫及公日切劇爲文章揚摧風雅以相振發酒食
會聚婆娑酣嬉以相樂時稱十才子已而公選入內
臺爲御史即抗疏論劾當道大臣用是詔下獄謫
桂林學教授天下又皆高公之節而諸子者亦各以
氣節自著不獨才也公由桂林稍遷汶上知縣嘉興
府同知擢湖廣按察僉事持憲專決恥唯唯恭遜意
小拂即日挈舟徑歸引疾致仕嘉靖更化錄聞廢諸

賈乃起公山東僉事陞布政叅議陝西叅政拜都察院右僉都御史巡撫寧夏尋改督儲南京公居南京一日聞太夫人居家疾劇即解印馳歸或以職守難之曰吾安能顧此耶會改公督理河道命下值郊恩馳封躬捧冠帔至家踰四旬太夫人乃殂時論公孝咸所致云嗚呼士平若學問談理道至居官臨事擇利害爲趨舍惴惴恒患失之惟公所履歷侃直自述邁往弗回志節可槩見所謂篤信好學者非耶假令公履高位當大事其不爲懼怯委懦徇時也必矣是歲三月公服闋拜南京大理寺卿衆謂駸駸柄用矣

到官甫五十日遘疾遂不起則豈非命也夫其可悲
已公諱洋字望之姓孟氏生成化癸卯五月二十三
日卒嘉靖甲午七月二十五日年五十有二公坦易
諒直與人交無諂色無詭辭居官務大體所至聲色
不動績効畢著平生俸入以義散俱盡死之日無以
爲歛方屬疾即以後事屬都憲顧公華玉及通政林
公懋易二公者日往問其終也視其歛焉顧公述狀
而屬書爲銘

南京大理寺卿李公顯墓志銘

費案

嘉靖甲辰五月二十有六日南京大理寺卿李公卒
公諱顯字崇綱別號臺南少穎異奮志于學不遑晝
夜叔祖太守大奇之謂其父筠軒翁曰此佳兒也甫
冠克邑庠生舉正德丁卯鄉薦戊辰進士己巳出宰
閩縣惠政覃敷當道以良吏薦壬申擢雲南道監察
御史乙亥出按貴州會苗夷弗靖總憲欲加兵勦之
寇益大肆侵暴且蕩巢諸司屢乖憲度事久弗集公
具疏劾之乃隨山築道直抵夷穴據險下擊夷皆授
首於是大行賞罰冒功夙弊剗刈殆盡遐嶠之衆賴

之以安捷聞

上賜綵幣既復命攝兩道繁仍參駁

諸奏稿戊寅復按廣東因取道抵家值筠軒公病亟
乃日親藥餌迨至不起辛巳服闋補任仍分理二道
事癸未擢知淮安府繼遭太夫人喪公兩經大變喪
葬皆庀丙戌補贛州擒龍南安遠諸寇以功調蘇州
益力民務歲歉民糶色者如焚溺切身設法賑濟民
獲其休已丑陞湖廣按察司副使兵備辰沅二郡蘇
之察案及諸耆舊咸醖金爲贐公悉卻之辰沅遠徼
洞庭人恃險爲寇公練兵設伏待警而發久之畏威
遠近人安利涉夫癸巳遷山東左叅政河堤崩決撫

按諸臣將鳩工集事公協謀効力卒底于成 帝嘉
其能俱荷上賞甲午轉河南按察使時寇賊剽掠公
勞米安輯誅止渠魁餘釋弗治復有金幣之賜丙申
擢雲南右布政使丁酉改貴州左布政使公以其地
審通夷落不可法繩也恒以恩懷之有犯者薄示以
罰而民用丕變焉戊戌擢都察院右副都御史提督
軍務巡撫南贛諸郡公嘗守南贛民幸其來也蔽野
迎之會有安南之後公運籌設備卒致來格荷鐙幣
之賜壬寅陞南京大理寺卿將戒行適贛之頑民糾
衆竊發曰舍此弗戢害罔熾矣乃會兵遠擊踰年始

平積勞成疾久不能興遂上疏乞休獲命而歸退居
固守不爲物累考訂家禮創立書塾教育子弟而於
鄰里之窮乏者每賙助之人方望其仕輅再振覓以
辭終悲夫公生於成化己亥六月二十八日得年六
十有六

南京大理寺卿王公湘墓表

于慎行

公諱湘字大清居近六逸之跡自號竹陽其先萊之
平度人國初以士伍西徙隸濟寧衛世有隱德至父
諱信施仁累善日益有聞初室於李舉漢及滄再室
劉舉公及江消公狀貌魁碩弱不好弄未冠補博士
弟子與季消同時聲相埒也嘉靖乙卯偕計吏上乙
丑舉進士改爲翰林吉士時館選久停首膺茂簡譽
人榮之隆慶改元舉解爲山西道監察御史姜夫人
卒於鄆乞假得以喪歸期而逆宋夫人宋夫人者故
中丞鉅野宋公滄孫也禮成詣闕還報奉命延視內

藏條列五事痛革散習及設官吏平權量如十庫法
禁帑肅然出按貴州調畫機宜振紀布惠發帑賑服
無何請急歸省歸而丁母夫人艱萬曆癸酉服闋止
上塗遇海上運舟漂損過當衛士寃號跪請亟罷海
運專用漕輓以息民勞有詔如御史議遣按順天時
罷兩關使者以公兼攝公身行障塞繩以三尺如其
故使大將以下奉約惟謹御史按畿內滿歲輒更程
書迫急獄囚久繫不時報遣多庾死者公爲先期核
請論出二百餘人三輔無寃乙亥內察署河南道始
相有所風執弗從以是見嚙推視南畿學政從中沮

止改按江西旋陞陝西按察副使妖徒李一真聚衆
行劫吏莫能制公授方略殲焉遷浙江布政司叅政
分守金衢汰冗剔蠹興革爲多義烏少年多去本業
應募從軍公命長吏加意拊安遇有召募應以浮民
毋發閭左壬午杭營之變衢兵聞風將謀不聽公登
壇集衆示以軍法士股弁迄無敢譁是年遷本省按
察使旋改山西至則擢湖廣右布政使期年轉左
上遣中貴人從司寇卽治江陵公爲藩長主議請毋
以故相波及全楚司寇從之籍其見產以報無所株
連中貴欲復遄回公請大集吏民間便宜狀皆謂不

可因據其議以復中貴弗能奪也此兩事有大造於
楚楚人德公而公爲故相所抑反全其擊世尤多公
長者每歲催稽賦稅裁閑狹相貸宗人常保給發以
時毋使撓法郡邑輸賦令官解自親衡石完庫無與
焉文書上下應時給發或不越宿稽核賦法哀益盈
縮撮其要領著之圖籍以爲永式故事採木之後內
金於司受而出買弊端益多公度郡邑遠近令以便
宜召買司受其成不問出入費省而速及他所裁損
嚴可鉅萬秩滿奏績策書褒美贈大父宣父信甘左
布政使大母唐母劉皆夫人兩元配有今號焉居楚

五年遷南京太僕寺卿抵滁值戢不稔出秩金糴穀
卽賑滁人賴之未幾陞南京大理寺卿亭平爰書一
以律文從事無所唯阿嘉興陸公時爲司寇亟稱服
之嘗與一要人有郤遂構煩言上知公忠慎有詔
廷尉第歸今且召用矣公在位幾三十年奉法守官
誠心體國端方慎重事無妄發故所至皆有績効去
而見思平生恬靜簡朴無所芬華外夷中介不工俯
仰當塗故舊請問踈闊歸日與昆弟親戚醢社歡飲
使車及門輒匿不見亦無報書識者嚴之居家敦倫
樹範內行甚修子弟遵其矩矱一門雍睦動有禮法

與鄉人處田疇謙冲不作貴俗聞軍民疾苦輒爲言
吏或不使知焚獨無告時有施舍里人頌義焉病而
群禱於祠及而悲嘆其得人如此生嘉靖戊子十一
月卒萬曆癸巳二月得年六十有六嗟夫士品之消
久矣王公閭修實踐皜然不滓朝無違言鄉有遺思
斯不謂老成恪亮有先進之風者與

大理寺左少卿呂升傳

實錄

大理寺左少卿呂升浙江山陰人由舉人授溧陽教諭陞江西按察僉事坐事降官與纂修永樂大典復爲僉事歷山西福建考滿陞大理寺少卿升清介勤慎爲僉事時所至以興學爲務能激揚士類爲少卿用法公平至宣德八年八月以老疾奏乞致仕從之仍命給驛還鄉

南京大理寺右寺丞贈大理左少卿黃公鞏傳

袁 泰

黃鞏字伯固福建莆田人弘治乙丑進士授德安府推官部使者交薦之以考績留爲刑部主事堂官皆遣子就學令掌一部奏牘尚書何鑑轉兵部奏調鞏爲兵部主事倚任尤專正德甲戌進員外郎克會試同考官得馬理等三十餘人皆知名士歷車駕職方二司郎中以母喪去服除時武宗北狩人心危疑或謂鞏勿出鞏題其書室曰茅屋石田爲生太拙鳴夷馬革自許何愚蓋已有志殉國矣補武選司郎中

已卯春有旨南巡時寧藩蓄逆上下以爲憂大臣科
道交疏不聽諸部寺司屬咸起而諍之輩以其事出
于邊將江彬誘惑彬方席寵擅權無敢及之者輩獨
疏六事畧曰陛下臨御以來祖宗之紀綱法度一壞
于逆瑾再壞于佞倖又再壞于邊帥之手至是將蕩
然無餘矣天下知有權臣而不知有陛下寧忤
陛下而不敢忤權臣陛下弗知也亂本已生禍變
將起竊恐陛下知之晚矣試舉圖治六事於今爲
最急者陳之其一曰崇正學嘗聞吉凶悔吝生乎動
吉一而已動可不慎乎仰惟陛下聰明天縱有古

帝王之資然其所以盤游無度流連忘返者無乃動
之過乎論思勸講之臣職在格心於是乎不能辭其
責矣伏望 陛下高拱九重凝神定慮屏紛華斥異
端遠佞人招延故老咨訪忠良可以涵養氣質薰陶
德性而聖學惟新聖政日舉矣其二曰通言路嘗聞
言路者國家之命脉也言路之通塞國家之治亂係
焉切見近時臣僚奏牘間或言及時政往往匿不以
聞其或事關權臣則又留中不出而中傷以他事夫
古之明主導人以言用其言而顯其身後世則不然
不用其言而反罪焉今則又不然不使其以言獲罪

而以他事獲罪由是雖有安民長策謀國至計無因以達于九重之前雖有必亂之事不軌之臣陛下無由而知之矣天下烏得而不亂哉伏望陛下廣開言路以作士氣不責以出位不加以好名如此則忠言日進聰明日廣雖亂臣賊子亦將有所畏而不敢肆矣其三曰正名號嘗聞孔子有曰名不正則言不順言不順則事不成禮樂不興刑罰不中民無所措手足凡以名不正之故也陛下近日以來無故自稱爲威武大將軍太師鎮國公遠近傳聞莫不驚疑竊歎以爲恠事陛下聰明智勇上嘉庚虞下樂

商周何所不至顧乃自輕如此柰宗廟社稷何夫
陛下自稱爲公誰則爲陛下者天下不以陛下事

陛下而以公事 陛下自天下皆公之臣而非 陛

下之臣也伏望即日削去鎮國公等名號以昭上下
之分以明示天下之人庶幾體統以正而朝廷自尊
矣不然古之天子亦有稱爲獨夫與欲爲匹夫而不
可得者切爲 陛下懼焉其四曰戒遊幸嘗聞大禹
日罔遊于佚罔淫于樂周公告成王毋淫于觀于佚
于遊于田春秋譏觀魚終綱目書巡者二十九皆譏
也 陛下始時遊戲不出大庭馳逐止于南內論者

猶謂不可既而幸宣府幸大同幸太原幸陝西榆林
諸處所至費財動衆寓縣騷然至使民間一夫一婦
不能相保 陛下爲民父母何忍使民至此虧損盛
德貽譏萬世 陛下自視爲何如主也近者復有南
巡狩之命南方之民爭先挈妻子避去流離奔踣敢
怨而不敢言即今徐淮之饑父子兄弟相食天時人
事如此加以休息愛養猶恐不支况又重以蹙之其
何不流而爲盜賊速而爲死亡也哉奸雄窺伺待時
而發變生在內則欲歸無路變生在外則望救無及
陛下斯時悔之晚矣伏望陛下深惟往事之非翻然

悔悟下哀痛罪已之詔與民更新罷南巡撤宣府行
宮示不復出發帑帑以賑江淮之饑散提軍以歸卒
伍斥不御之女各還其家雪既往之謬舉收既失之
人心如是則尚可爲也其五曰夫小人嘗聞自古小
人用事未有不亡其國而喪其身者也謹按今之小
人簒弄威權貪國富貴者寔繁有徒至于首開器事
以兵爲戲使 陛下勞天下之力竭四海之財傷百
姓之心至今紛紛未已者則江彬之爲也彬本行伍
庸流兇狼傲 無人臣禮臣等但見其有可誅之罪
而不見其有可賞之功今乃賜以國姓封以伯爵托

以腹心付以提督京營之寄此養亂之道也彬外挾
邇卒內擁兵權騎虎之勢不亂不止天下之人切齒
唾罵皆欲食彬之肉彬不誅天下之亂必自彬始
陛下亦何惜一彬以謝天下哉伏望 陛下大奮乾
綱將彬下諸廷議明正典刑以爲奸邪小人迷亂之
戒其六曰建儲貳嘗聞漢人有言曰太子天下本本
一搖則天下震動夫有本而搖天下猶震况于無本
其何以安洪惟 陛下春秋漸高前星未耀祖宗社
稷之托茫然無寄方且遠事觀遊屢犯不測此必危
之道也 陛下徒知收置義于布滿左右獨不能豫

建親賢以承大業臣以爲左也伏望 陛下早及是
時將群臣建儲章䟽通行檢出宣付勳戚及文武大
臣共圖大議即於宗室中選親賢一人養于宮中使
繫四海之望待他日誕生皇子之後俾其出就外藩
如此則繼體有人國本以固實宗社無疆之休惟聖
明其留意焉車駕員外郎陸震見其䟽稿願同署名
以進䟽入自分必死爲書別知友託以後事及收拾
遺文彬果大怒欲必實之死乃下詔獄延詭五日杖
百餘除名陸竟死體極修羸幸得甦以詩遺其弟
曰不用汝謀方至此須知我道固當然蓋萬死不悔

也兩都盛傳輦跡幾于紙貴無不嘆其剴切者輦歸
杜門著述家貧留客賃米鄰舍日中未舉火晏如也
今 皇帝中興起爲南京大理寺丞尋病卒贈大理
少卿袁孝曰 武皇帝之南巡也外有宸濠之覬覦
內有江彬之惑亂朝野危疑社稷幾搖而黃公獨奮
其精忠危言極論明白痛切可爲流涕國朝諫書秘
在石室者余不盡知嘗所目見未有如輩者也嗟乎
以斯人而使之無年天其曷故哉雖然讀其書雖與
日月爭光可也

南京大理寺評事夏公猷墓志銘

楊循吉

粵惟我國家成弘間 二聖臨朝重離繼照一時人
才彙興笙鏞治化而赤城先生奮起浙右海內莫不
尊慕而稱道之不啻丹鳳之鳴岐陽也蓋其爲人忠
信樂易有文而寡德其於事見義必爲務盡其力自
非力竭不止遂以賢聞然而官不過七品且自入官
多家居僅守遺田無一增產竟以嘉靖十六年春二
月朔考終千里第壽八十三至停輿總轡閱八稔未
克葬侍郎沃洲呂公爲舉其喪事俾愚書之以益勵
風化按狀先生諱猷字德樹天台人也曾祖進隱耕

不仕祖旦封文林郎監察御史祖妣丁氏封太孺人父墳景泰辛未進士累官都察院右副都御史年未五十由廵撫四川勇退隱居時稱名臣母盧氏封孺人都憲登科之五年爲歲乙亥先生生於京邸從幼篤志於學自專經外於書無不觀好爲古文詞上追秦漢由是著聲多士中都憲之將歸也先生方弱冠即推易象消息爲詩馳獻以滿盈爲戒都憲欣然遂成其志父子相期不於富貴而於道德頌然也都憲歸五年卒先生不欲乞恩求葬祭鄉人在都下代爲請命而喪事已畢例得官給白金七百兩供祭典餘

悉散貧族衆方駭其所爲丙午途由邑庠生中浙江
鄉榜明年丁未試南宮復中試賜同進士出身未幾
詔放歸家限滿未赴 孝廟四年歲在辛亥先生起
赴闕上疏乞近郡教授冢宰王端毅惜不與遂落落
不與衆伍會王事李文祥庶吉士鄒智御史湯鵬姜
綰給事中方向等以論列大臣言直得罪皆左降降
外任先生抗章論救并劾大臣詔建錦衣衛獄推治
無所得居月餘釋送銓曹謝病歸十四年庚申復起
赴選時虜寇邊孔棘九重宵旰先生在路自台歷杭
由三吳渡江及淮經齊魯至輦下數千里間見百姓

流離科差繁重有司莫之卹以爲茲惟邦本虜患抑
在其次乃備叙其狀以疏進冀上罷不急下寬條
愛元氣以爲宗社無疆之休稟情懇切語至觸冒無
顧慮章雖不省而平居經濟宏才亦因是可槩見亦
不以其言用否介意久之當受職時當軸者忌先生
剛鯁不欲置近要途除南京大理寺評事以疎處之
先生亦黽就職居歲餘守脩內臣違例准受民詞即
論奏落其權軍民皆嘆服十六年壬戌以母老無人
侍側告歸乞終養詔許之又二年爲正德改元先生
自歸家後早暮庭帟承顏奉甘旨無違志毋以壽終

服除乃始寄興物外山泉琴酒與友偕樂然絕口不
談時事 皇上龍飛振作宇宙大起天下隱約而用
之先生以老辭

龍溪錄卷之六十九終

焦太史編輯國朝獻徵錄卷之七十目錄

太常寺

掌寺事尚書

劉爰

崔志端

田景賢

掌寺事侍郎

丁永中

卿

呂本

黃子澄

姚友直

夏景

吳節

孫賢

齊章

周詔

魏校

少卿

高遜志

廖昇

盧原質

陳贊

蹇英

林文

李璋

楊時

張衍瑞

潘府

郭維藩

李開先

周怡

傅霏

寺丞

張來儀

杜環

袁珙

南京太常寺

卿

徐初

陳音

呂憲

方鵬

牛鳳

穆孔暉

少卿

鄭雍言

夏瑄

鄭環

劉稱

夏良勝

黃重

汪佃

王世懋

目錄終

史編輯國朝獻徵錄卷之七十

太子少保禮部尚書掌太常寺劉岌傳

寶錄

劉岌字凌雲四川涪州人景泰甲戌進士授吏部主事遷郎中以憂去服闋改戶部二年仍補文選公清勤慎時論與之累官太常卿禮部尚書掌寺事久典秩祀練習儀章且容觀魁梧音吐渾暢甚爲

憲朝所眷注進太子少保以疾乞致仕不許岌自陳世爲戎籍勅兵部除其籍弘治己酉岌復以老請乃賜馳驛并寶鑑以還仍命有司歲給夫廩家居凡十七年而卒時弘治十八年八月計聞賜祭葬如例

康徵錄

卷之七十

乙

平生謙謹至稱人之善聞論人過失輒止之或面侮之亦不校初艱于立子官京師妾有生子者其妻妬而棄之道人爲收鞠至八歲乃復迎歸以爲子聞者以爲岌厚德之報云

禮部尚書掌太常寺事崔志端傳

實錄

崔志端順天宛平縣人由神樂觀道士克業拜生成化壬辰授太常寺贊禮郎辛丑補寺丞壬寅補少卿弘治乙卯遷卿甲子進禮部尚書仍掌太常寺事具疏乞休致至再始允焉歷觀中癸酉陳情優養特給夫米正德九年六月卒其孫序班承祖乞祭葬所司執奏以其發身雜流例不得濫與上不聽竟與祭一壇

太子太保禮部尚書掌太常寺田景賢傳

太子太保禮部尚書田景賢字宗儒順天府涿州人
成化乙未進士授戶科給事中陞通政使司右叅議
弘治辛亥陞太常寺少卿通政使尋陞禮部右侍郎
掌太常寺事正德戊辰陞禮部尚書掌寺事屢賜玉
帶及金織麒麟衣庚午加太子少保引年乞休疏志
上乃加太子太保賜璽書乘傳以歸命有司給月廩
歲祿正德十四年六月卒賜祭葬如制景賢體貌魁
岸音吐洪暢爲人淳實守官四十餘年廉謹如一日
晚年清潔寡欲人所罕及卒之日幾無以爲歛士論

秋後錄

卷之七十

三

稱之

禮部右侍郎掌光祿寺事艾福傳

實錄

禮部右侍郎艾福字天錫湖廣漢陽人天順四年進士授監察御史成化初巡按山西考覈官庶黜不職者九十人旌其能者七人畱錄重辟有童年十三分盜贓米一釜憐其幼特請釋之遂用是起名三年復按浙江以父喪歸八年擢光祿寺少卿十三年陞卿凡典御膳及諸供應皆區畫有定十四年上疏請省異教供餼坐繁詔獄奪俸六月十九年擢禮部右侍郎仍掌寺事累上疏乞歸始命致仕家居八年以弘治五年七月卒年七十三計間賜祭葬如例福為人

通達習於世故願傷輒熟晚在光祿爲近幸所侮不
能堪累乞退避竟遂其志以去人亦以是多之

掌太常寺事禮部左侍郎丁永中傳 實錄

掌太常寺事禮部左侍郎丁永中大興縣人由神樂觀樂舞生選授太常寺贊禮郎歷陞協律郎寺丞少卿卿至禮部左侍郎仍掌寺事弘治三年言者劾令致仕至七年四月卒賜祭葬如例永中以黃冠厠薦紳列五十餘年生既獲封贈其父祖如已官卒仍獲沾三品寵卹之典視士夫著勛烈者無以異亦異事也

太常寺卿呂本傳

實錄

呂本鳳陽壽州人仕元爲元帥府都事其後來歸歲
丙午爲中書掾史吳元年授湖廣行省照磨洪武三
年陞中書省右司郎中四年改左司郎中五年陞刑
部侍郎尋進吏部尚書六年除太常寺卿七年以事
左遷北平按察司僉事尋召還授禮部尚書未幾出
爲兩浙都轉運鹽使十二年復授太常寺卿至是以
疾卒賜葬鍾山之陰本無子其女爲皇太子妃

太常卿黃公子澄傳

鄭曉

黃公子澄名湜以字行分宜人少受易歐陽貞書周
與學春秋梁寅有文行負盛名洪武十七年貢入太
學明年進士舉禮部第一授翰林編修陞修撰伴讀
東宮累官至太常卿建文君爲太孫時坐東角門
謂公曰諸王尊屬擁重兵奈何對曰諸王僅有護兵
纔足自守萬一有變以六師臨之誰其能支漢七國
非不强卒底亡滅小大強弱之勢不同而順逆之理
異也太孫喜每呼公黃先生太孫即位倚任公
謂曰先生無忘東角門之言公頃首應曰不敢遂出

與齊太議削奪諸王兵權未幾周王得罪 建文君
書論 文皇 文皇爲曲解公曰燕周母兄弟燕王
出塞有功威名日盛不併去燕後難圖於是出兵開
平諸鎮及更置北平守臣伺府中事日急靖難兵遂
起及耿炳文諸將相繼敗北 建文君召問公對曰
勝負兵家常事今天下富勝兵強食足區區一隅豈
能當天下全力聚兵五十萬四面並進旦夕且成擒
公遂薦李景隆爲大將代炳文景隆尤昏懦戰輒敗
棄其師遁召還京又赦不誅公慟哭曰景隆出師觀
望懷二心不亟誅何以謝祖宗厲將士練子寧亦執

景隆於朝且哭且數請誅之皆不聽江淮諸將連敗
公拊膺慟哭曰大事去矣誤薦景隆萬死不足贖誤
國之罪賦詩云仗鉞會登大將壇貂裘遠賜朔方寒
出師無律真兒戲負國全身獨汝安論將每時悲趙
括懷夷何日見齊桓尚方有劔憑誰借哭向蒼天幾
墮冠靖難兵至淮上建文君不得已遜公密使募
兵而以竄齊黃使告燕文皇曰此緩我也請悉召
吳傑平安盛庸師還即已建文君爲遣少卿薛嵩
請罷兵文皇帝又不許兵抵江干蘇州知府姚善
言公文武才略兄捍國難顧屏諸閑遠以快敵人胡

失計至此始急召公未至金川門失守 文皇執公
責問不服族其家一子走易姓名田經遇赦家湖廣
咸寧正德辛巳進士黃表其後也

太常寺卿姚友直傳

實錄

姚友直名益以字行。荆江蕭山人。洪武甲戌進士。授中書舍人。累陞司經局洗馬。永樂中。宣廟爲皇孫時。奉命投書并授勅。獻王凡所顧問。必以正對。王以賓禮待之。未幾陞左春坊左庶子。及滕王建國。雲南陞雲南左叅政。掌長史事。滕王憑因事至京。宣廟嘉念舊勞。擢太常寺卿。正統三年正月辛遣官賜祭。命有司給舟車歸其喪。營葬焉。

太常寺卿夏杲傳

太常寺卿夏杲字仲昭直隸崑山縣人初姓朱名昶
舉進士爲翰林院庶吉士 太宗嘗召見之謂曰太
陽麗天日宜加於永上和字宜作杲字書有杲字始
此既而杲又自奏復其本姓爲夏以善書供事內省
嘗扈從兩京授中書舍人宣德中轉考功主事仍供
內直正統十年用薦者陞卿致仕年八十三卒時成
化六年八月訃聞賜祭葬杲既善書亦能詩精繪事
尤工墨竹以此得名于世爲人坦率樂易不拘小節
時出入禮法間人亦不甚非之晚年家居頗效楊庶

夫之爲人以詩酒燕樂自娛云

太常寺卿兼翰林院侍讀學士吳節傳 實錄

吳節字與儉江西安福縣人宣德庚戌進士選爲翰林院庶吉士授編修秩滿陞侍讀景泰初陞南京國子祭酒滿九載加從三品祿 上初即位修 英廟實錄以節嘗預修 宣廟實錄知典故召爲副總裁既至改太常寺卿兼侍讀學士書成進本寺卿兼官如故未幾丁母憂賜祭葬服除請闕謝恩遂乞致仕時年已七十餘既得請家居十餘年卒時成化十七年七月年八十五訃聞遣官祭葬節爲人平易質直信人不疑爲文如其爲人初治春秋學與同學劉球

齊名又同入翰林學春秋者多師二人而節之徒尤
衆後進宗之安福春秋遂擅名于天下其爲祭酒承
陳敬宗之後敬宗師道嚴甚流爲寡恩節矯之以寬
士類悅服久之流于縱弛聲望不逮敬宗云

太常寺卿兼翰林院侍讀學士孫賢傳 實錄

太常寺卿兼翰林院侍讀學士孫賢字舜卿河南杞縣人景泰甲戌進士第一授翰林院修撰修寰宇通志成陞侍講天順初改左春坊左中允侍 東宮講讀 上即位進太常少卿兼翰林侍讀修 英宗實錄成進太常卿兼侍讀又進兼侍讀學士時成化庚寅歲也逾年請立 皇子爲 皇太子且引疾乞致仕以示無希覬意章並上 上背允之皇子立是爲悼恭太子賢聞家憤憤不樂而難分言成化十三年十一月卒年五十四計聞贈禮部左侍郎兼翰林院

學士命有司祭葬如例賢起諸生不十年至通顯然
無大過人者性剛急或勸之學詭然怒曰孰爲程朱
孰爲韓柳護前忌才不能容物其輕于舉動尤爲人
所哂云

通議大夫太常寺卿慎軒齊公章墓志銘

林 瀚

公諱章應璧其字別號慎軒世家永平之深州大父
貴從 文皇靖難授燕山左衛試百戶父安累立載
功歷陞指揮僉事公雖生于將門自少篤志力學與
伯兄文同領天順壬午鄉薦登成化丙戌進士己丑
文亦第甲科官至戶部副郎人以二難稱之公初授
戶科給事中甲午丁外艱服闋復除本計庚子進左
給事中再進禮科都給事中壬寅轉鴻臚寺丞尋進
少卿弘治庚戌太常卿缺員慎其選吏部以公薦

上簡任之凡郊廟祀典駿奔誠恪儀文節奏亶極詳明天子嘉其勞荐膺寶鏹之賜且于誥進階贈祖父如其官祖母呂母郭並淑人公在太常幾六載寅恭匪懈翊贊國家禮樂之功居多其在鴻臚傳玉音達下情鐸鏗洪亮金玉相宣凡朝覲會同萬方聳聽壯觀國威之功居多其在諫垣累抗章論列陳時政得失以激直忤旨下詔獄人或危之公曰君仁臣直吾忍負聖明哉竟從寬貸間者燧之謂得諫臣體其氣節凜凜扶持國是之功居多嘗奉使冊秦晉二宗藩禮成覲遊一無所受其謹於操持增重國體始

終蓋一致也惜乎天不永其年僅五十八而卒距其
生正統戊午七月二十三日也禮部以計開上震
悼遣官諭祭營葬域

太常寺卿贈禮部右侍郎長洲周公詔傳

顧璘

周詔者直隸長洲人也自少有氣節成化庚子登鄉試授嘉祥縣教諭九載考績入京時 睿宗皇帝方開府置屬途與選爲伴誼選紀善詔以國事草創宜有典則以垂後世乃本祖訓及中脞九經之目爲書數千言以獻 睿皇嘉之尋以憂去賜予甚厚復仕加長史俸詔感知遇因事納忠言多切直 睿皇喜書君子懷德及諸詩以賜之每見稱爲先生而不名詔數請謝事不許乃以展墓乞歸其鄉及近國未至

而 虜皇崩詔匍匐奔泣如喪考妣事 今上益竭
心力每進講經史 上爲之竦聽扈駕入京師還詹
事府少詹事兼翰林院侍讀將大用之居數月疾辭
轉太常寺卿遂卒於官 上聞惋惜贈禮部右侍郎
陽祭葬子璘詹中書舍人孫儒廕大學生

太常寺卿魏公校傳

魏校字子才蘇州崑山人弘治乙丑進士正德元年
丙寅授南京刑部雲南司主事遷陝西司員外郎廣
東司郎中每訊重囚瘡居默念務期得情凡獄之寬
滯人所不能決者即片言決之會審監刑衆皆采衣
即事事畢宴飲爲樂公則慘然潛服是日不飲酒食
肉時關臣劉瑾擅權其常到瑯守脩南京衙門作威
臺省官望塵奔謁公獨不往瑯復夷視法司或時判
狀至莫有抗者惟公直行已志京邑有經歷姚元者
從子利其富貲誣以奸狀賄瑯陰爲之地必欲寘元

於死屬公訊之竟白其枉瑯亦莫敢誰何暇則與余
公子積夏公敦夫王公純甫講明聖賢之學正德九
年召爲兵部職方司郎中方江彬握重兵居大內而
寧藩亦有反謀遂移疾家居正德十六年辛巳今
上初服起公首膺廣東提學副使之命力以師道爲
已任崇德行畧文詞毀淫祠興社學禁火化厚人倫
厥功爲多尋憂居復補江西兵備改河南督學轉大
理寺少卿國子監祭酒太常寺卿公性孝友每夙興
即省其父母夜則就寢所晤語無恙乃即安或疾則
累晝夜目不交睫政時母張老矣日依依侍食於

創平生篤志聖人真猶儀淵之於飲食其學主于立
本研幾由慎獨以通於性命稽古以協于明誠始博
而終約著有大學指歸六書精蘊卒謚恭簡

太常寺少卿高遜志傳

高遜

一作吳

志字士敏直隸蕭縣人元末僑寓嘉興好

學嗜文嘗侍文宦遊吳中一時文章家如宣城貢師泰鄱陽周伯琦遂昌鄭之侑俱客遊吳遜志皆獲受業故其爲文深醇雅則成一家言年二十五爲鄞山書院山長洪武二年徵修元史入翰林爲編修累遷侍講學士革朝庚辰會試禮部尚書陳迪侍中黃觀知貢舉遜志以太常寺右少卿與董倫爲考試官得吉水王良常熟黃鉞莆田陳繼之廬陵胡廣崇仁吳溥建安楊子榮新淦金幼孜石首楊溥武進胡濙太

康頤佐時稱得人同較藝者右拾遺朱逢吉編修史
官吳勤葉惠仲趙友士徐旭一作張秉彛監試御史
王度俞士吉亦一時之選壬午之變王度葉惠仲死
難餘順命顯庸遜志存沒無可攷見殆晦迹終身挺
節不汙於時耶

太常寺少卿廖昇

忠節錄

廖昇湖廣襄陽人未詳其所以進學行最知名與方孝孺王紳輩友善洪武二十九年由左軍都督府斷事擢太常寺少卿建文初修

高皇帝實錄昇與爲纂修官昇博雅有才明達有氣靖難兵渡江忠誠伯等自龍潭敗還昇聞之遂慟哭與家人訣自經死都御史陳瑛奏昇與黃觀王叔英周是修王艮顏伯璫等皆不順天命效死建文此其存心與叛逆等並宜追殺以儆奸朋詔勿問

太常寺少卿盧原質

忠節錄

盧原質字希魯浙江寧海人母方氏孝孺之姑也原質於孝孺爲外兄而同學得之方門爲多洪武戊辰舉進士第二人授翰林編修歷太常少卿建文中多所建明靖難後召見不屈死之弟原朴論死族其家

太常寺少卿進階亞中大夫陳公贊墓志銘

太常少卿陳公致政之七年以疾卒于家其子通政
司右通政嘉猷奔喪有期乃以編修鄭君之狀來請
銘公姓陳諱贊字惟成別號蒙軒世爲餘姚人宋咸
淳中有兄弟同舉進士者曰應典曰龍榮應庚即公
六世祖也曾祖俊民元上虞縣學教諭祖達道隱居
不仕父性善仕國朝官至刑部吏曹即中母馬氏繼
卓氏公幼穎悟不凡稍長從鄉先生宋公傳張天民
學博極經史期以策名科第作懷二都賦以見志已
而再試有司不偶輒棄去用杭州府知府盧玉潤薦

爲儒學訓導嚴立條約敎迪有方門弟子出爲顯官
者十餘人浙江左布政使黃澤雅重公文行金石制
作必以屬公宣德乙卯纂修 宣廟實錄天下郡國

當會萃事蹟以上而兩浙十一郡之事公實總之時
稱有史才明年滿考起京簡任翰林待詔授中使書
于內館諸生薰其教化成才者衆秩滿陞典籍尋遷
五經博士未踰年以學士高公穀薦陞廣東布政司
左叅議時廣寇黃蕭養之亂甯平公撫摩凋瘵拯盡
仁恤訪鰥寡幼穉之被掠賣者以還其家瘞兵死遺
骸親爲文祭之以憫其不幸聞者感悅其他善政宜

民者樂類此廣民至今思之不忘景泰癸酉遷太常
少卿以儒相祀與論稱朕天順丁丑野一致仕不許
尋蒙 賜誥進中憲大夫有清慎端重之褒贈父如
其官二母皆恭人越三年再請始得休致時年六十
有八矣適其子嘉猷有使滿剌加國之命因便道奉
公至杭以別墅在西湖之側遂留家焉先是浙中名
卿大夫致仕家居者六七公南京吏部尚書魏公驥
其一也聞公歸皆來會喜相謂曰歸老之榮皆 上
賜也乃約月一集爲恩榮會會必賦詩爲樂蓋不戒
洛下風致云公每遇良辰輒偕從弟致仕知縣寶及

縣人墨士遊玩于湖山間其別墅中亭堂以十數皆
勝處可樂也客至必命酒投壺徜徉竟日鄉人羨慕
之目爲神仙中人天順甲申詔進階亞中大夫成
化丙戌三月三日即世距其生洪武壬申閏十二月
六日春秋七十有五臨終神思清明謂次子嘉瑞曰
吾家受國恩三世矣其語爾兄勉力以圖報稱語
不及他公性資凝重心地坦夷平居寡言笑而和厚
之氣藹然可掬早喪父家雖約而能竭力襄大事以
禮事繼母能盡其孝處諸從兄弟極友愛教育從子
無異已子居官三十餘年恒以勤慎自勵所至著聲

稱平生工詩文古選遍陶柳近體駢駢乎盛唐書法
頗得晉人筆意所著有自娛藁客疊蕚薇垣藁撫安
錄歸田藁凡若干卷藏于家其和陶詩唐音及西湖
百詠梓行于世

太常寺少卿蹇公英墓志銘

周洪謨

公諱英字伯榮姓蹇氏重慶巴縣人太師忠定公冢
子仁孝淳謹太師寵冠群臣名震天下而公日侍側
親賢友仁匆匆然如寒家子畧不有假忤態衣服飲
食悉從儉約在南京時鄰居伏侍郎之隸卒疽發背
委諸途公見而憐之爲求劉御醫治得不死嘗遊句
容寓崇明寺寺有中官一僕亦發疽弗治以待斃公
爲延醫士張榮療之而愈永樂甲辰母劉夫人歿時
忠定公扈從鑾輿行在所來請治喪命至高郵湖暴
風壞舟舟人皆失色公籲天曰英平生不改爲悖理

事是行特請父命治母喪天如獨之尚貸其死少頃
舟漂至中州而止後扶柩歸權殯蒲圻公廬殯側時
久旱公爲文率父老禱於神時雨乃降禾乃登既免
喪上驛召來侍忠定所及忠定公薨哀毀踰制尋
授尚寶司丞以歸舟次江表風雨大至俄有覆舟順
流而下公急遣家僮以艇救之活男婦七人居縊母
喪不異所自出正統戊午服闋復職己巳扈從北征
明年庚午進本司卿一日朝廷行大婚禮先期禮部
失請寶璽之奉及期衆皆曰倉卒不可復請公恐禮
部重得罪力請奉之以成禮天順己卯進太常少卿

辛巳秋公患肺疾劇醫弗効一夕夢神人告曰勿憂
吾爲汝增福壽矣疾果愈上疏請老詔不允甲申得
疏懇請始獲命成化元年春治裝歸次南京疾復作
遂以是年冬十二月二十三日卒於都城內故第之
正寢年七十四計聞 上遣官致祭公前後居官几
三十年受勅者一受誥者再其詞有和厚明敏之褒
又曰持身端謹蒞事勞勩又曰茂修不懈清譽彌彰
平居喜讀書凡經籍子史及九流百氏靡不力購克
乎其室好吟詠所著有草亭集寓懷稿晚年人饋石
假山文如壽字因自號壽山老人配馮氏始久無子

忠定公請楊文貞公製詞禱於神樂觀齋沐往禱夢
有人語以道士寫祈文有誤視之果然遂生二子長
曰霖中書舍人次曰霑既官而卒

太常寺少卿兼翰林院侍讀學士林文傳實錄
林文字恒簡福建莆田縣人宣德庚戌進士及第除
翰林院編修正統初與修宣廟實錄成陞修撰兩
爲會試考官景泰中歷陞左春坊左諭德兼修撰進
左庶子兼侍講預修寰宇通志天順初以景泰中東
宮官改尚寶司卿仍兼侍講尋轉翰林學士上在
東宮文與講讀屢引年英廟重其人不許上即
位褒進舊學之臣陞太常少卿兼翰林侍讀學士越
月懇乞致仕歸成化十二年六月卒于家年八十餘
贈禮部左侍郎遣官諭祭命有司治葬事官其子載

爲中書舍人文性謹畏平生未嘗疾言遽色與物無
競與人交久而益親爲詩文不尚奇詭人稱爲長者
云

太常寺少卿李公璋墓表

徐溥

故少保吏部尚書兼華蓋殿大學士贈太師李文達
公有賢子諱璋字士欽仕至太常寺少卿年四十有
九弘治丁巳七月二十五日卒于京師之賜第君文
達長子母曰周夫人幼則莊重好學文達嘗誨以學
貫通古今務踐履勿爲近世舉子業故君兄弟不事
場屋進取英宗嘗命中書人詣文達家以子名來上
將錄用之文達辭曰臣子璋幼方就學何敢冒寵
英宗嘉嘆而罷及文達薨憲宗卽喪中特旨命君
爲尚寶司丞君歸襄事而周夫人繼卒君時年十八

元治喪持家內外斬斬服闋乃蒞職戊戌進本司少
卿辛丑進卿九歲考績進太常少卿上疏請革濫祠
清丁役增樂舞謹在事詔議行之丙辰冬有事天壽
山以勞瘁感寒疾嘔血而卒上遣官諭祭命錫中書
科書誥出身則猶以文達故也君雖以蔭官而力學
修行不懈嘗考吏部冢宰三原王公以管仲子產孰
優論君援筆立就文義粲然王公嘆曰此豈可以任
子例視哉其在尚寶嘗持節冊封代府楚府弘治初
遣祭嵩嶽及唐邵二府在太常又奉詔視濟瀆將命
外事既慎且恪餽遺禮幣一切謝却居家友愛脩至

處諸父兄弟有人所難能者嘗於宅旁作園池藝花
竹殿則與賓客觴咏其中所交皆一時名士於乎文
達之勲業在國史固宜有後焉而君之賢又能世其
家然位與年皆不滿德也縉紳士大夫多惋惜焉

太常寺少卿兼翰林院侍講學士楊時暢傳

太常寺少卿兼翰林院侍講學士楊時暢字知休陝西咸寧縣人太子少保戶部尚書鼎之子也成化戊戌進士改翰林院庶吉士授檢討弘治初與修憲廟實錄書成陞修撰未幾克經筵講官同考禮部會試詔選東宮官屬吏部尚書馬文昇以時暢薦改右春坊右贊善秩滿陞左春坊左諭德會典成再遷侍講學士正德改元以東宮講讀恩陞太常寺少卿仍兼侍講學士尋卒時暢美風儀善談論居家以友聞爲大臣子多識國朝典故及前輩遺事有幹

濟才未及用而卒

太常寺少卿張衍瑞傳

朱睦㮮

張衍瑞字元承河南汲縣人也祖杰監察御史父繼
湖廣左叅政衍瑞舉弘治十八年進士明年爲正德
改元授清豐知縣以勘事執法爲逆瑾所惡矯旨下
詔獄楚毒備嘗瀕於死者數矣瑾誅赦出歷陞吏部
文選司郎中十四年 毅皇自榆林還復欲南狩時
寧藩蓄逆上下以爲憂大臣科道交劾留不聽江彬
輩又從輿詔以三月壬子駕出行瑞曰即畏罪不言
寧不爲宗廟朝廷慮乎乃抗疏率同官六七輩赴闕
上之大畧言巡游費財動衆寓縣騷然而隱憂伏禍

且不可測 上不許明日諸曹屬各又上疏諫前後
百有七人詞益亟切 上怒罰跽門五日而京師忽
風霾晝晦禁內海子水溢高四尺許橋下七鐵在折
有金吾衛指揮張英者以是爲變之明驗乃肉袒戟
刃于胷以死諫 上大驚詔諸言事者各杖三十倡
之者謫外衍瑞得平陽府同知 今上即位召復原
秩尋擢太常寺少卿踰年卒於是言官疏衍瑞負性
忠直兩遭困厄宜加褒恤以勵臣工詔可贈太僕寺
卿仍賜祭葬廕子先是衍瑞同邑人劉珏以貢士任
刑部照磨亦以諫止南巡杖卒贈刑部主事

太常寺少卿潘府傳

實錄

太常寺少卿潘府，涪江上虞人。以進士仕，至提學副使，乞終養，遂不起。後以薦陞太僕寺少卿，改太常寺少卿。致仕嘉靖五年六月癸酉卒。府性至孝，嘗疏請行三年之喪。又上聖學淵源中興治要諸疏。居家有薦行，好著述。鄉評重之。巡按御史潘倣爲請乞祭葬。禮部復言：四品文臣例有祭無葬。上以府孝行可嘉，特令有司量與營葬。

太常寺少卿兼翰林院侍讀學士郭維藩傳

太常寺少卿兼翰林院侍讀學士郭維藩河南儀封縣人正德六年進士改翰林院庶吉士除檢討陞南京國子監司業翰林院侍講學士管南京翰林院事歷七載召還以原職管理誥勅克經筵講官尋改侍讀學士已充講大學衍義官纂修 列聖御製文集克曾錄官權今官嘉靖十六年十月卒 上念其謚讀勞特恩賜祭葬維藩敦朴孝友鄉人稱之

翰林院提督四夷館太常少卿李開先墓志銘

殷士儋

嘉靖初文治怡熙群良彙進于時仕于中朝者有八才子稱中麓李公其一也公以隆慶二年二月望卒于家嗣子幼弱里中無賴稍稍斷訖之而一二有司復持之急以故不克襄事者數年至是始議以壬申某月日葬公綠原村祖塋前期嗣子持狀來請銘余曰公吾邦之良也銘惡可辭按狀公名開先字伯華中麓其別號也先本伯陽之裔居隴西者最著其後始自隴西徙長嶽嶺又自長嶽嶺徙綠原村于是遂

爲章丘人數傳有名于時者公曾大父也子瞻生時
皆邑諸生聽生淳正德庚午舉于鄉娶于王而生公
以公貴累贈奉直大夫吏部驗封員外郎王累封太
宜人公舉嘉靖戊子山東鄉試第二人明年成進士
授戶部雲南司主事久之調吏部考功歷稽勲驗封
員外郎郎中己亥改文選尋擢太常寺少卿提督西
夷館居無何罷歸蓋家居者二十年而卒公生而卓
犖穎異七歲善屬文讀書一見輒成誦而又即知聲
律吟咏之學稍長補博士弟子員里中有孫後苦公
公自言于今令面試大奇之爲復其家于是齊魯章

終之士成嗒嗒惟教李生矣未幾贈公捐館舍公哀
毀盡禮已又喪其祖母公持服如贈公鄉人稱之服
除連舉進士嘗運餉金詣寧夏當是時關中有兩大
史康公海王公九思家在武功鄴社之間公業閒兩
公名及使還過訪之此兩公者居以才自雄睥睨一
世乃見公獨懼然相得爲留數日始別復移書府太
宰薦之抵家以疾在告者踰年始授戶部主事戶部
爲金穀劇曹而公所督太倉粟時尚有中貴人監之
公不兢不練委曲調停無撓法焉復奉命出理徐州
倉頃之以望調吏部爲太宰汪公鉉所器重故任吏

部者率矜崖岸高自標致局門謝賓客雖親故人不
相接以示尊公顧數與諸友游以詩文相處和暇則
浮白對奕談笑竟日而無廢事卒之人莫敢干以私
而稱吏部能謝絕請謁亦卒無踰公者公既負才氣
居銓衡要路素伉直不善事權貴人而諸僥倖見抑
者又日媒孽之時柄臣銜公不附已遣還卒廉公陰
事久之無所得終不釋公至是蓋已遷太常矣曾九
廟災公例上疏自陳竟中以他事令公歸歸時年才
四十耳居六歲而配張宜人又卒六歲而太宜人卒
公哀毀彌甚每哭輒撫棺號曰天乎乃不令姁見開

先舉子耶蓋遲遲者越八年始葬焉公故嘗病脾間
歲作不至劇丁卯秋乃大作踰年竟不起距生於弘
治壬戌八月二十八日凡六十有八歲公少博學彊
記有大志所與交皆當世知名士以意氣相許遇事
籌畫剖析多出人意表往先皇帝幸承天嘗命少
傅翟公巡九邊云翟公議自遼東始業已行矣公獨
請問謂曰公國家重臣也主上所倚任京師密邇
邊塞藩籬單弱虜颺迅可至今車駕在江漢公柰何
復遠去京師令緩急不相及乎公往宜自宣大此聲
實相副萬全之畫也翟公矍然悔失計拊手謝曰老

許不任事微君幸教幾失之卒改行如公策公之懷
慨知大計皆此類也嗚呼以彼其才假令秉筦鑰之
寄所建豎必且掀揭可觀乃于方壯之年竟一蹶不
復起雖致位卿貳稍稱通顯矣然實未究厥施也昔
人論馮唐李廣有不逢時之嘆乃先皇帝長馭遠
攬臣下一言稱旨即不次待以卿相可謂有時而公
卒擯棄不偶以死此又何說也比先皇帝上賓公
聞之蹕蹕幾絕意若無復有知己者公之情見矣公
目罷歸稍益克拓舊學與荆川唐公念菴羅公約爲
天台鴈蕩之遊值喪其內子不果行既而嘆曰會心

處不必在遠吾直巖居而川觀耳乃開亭館招致四方賓客時時以其抑鬱不平之狀發之于詩尤好爲金元樂府不經思索頃刻千餘言酒酣與諸賓客倚歌相和怡然樂也以是公之長篇短調徧海內而名亦隨之人或以靡曼謂公者公不顧嗚呼古賢智之士抱琬琰而就煨塵者或傍山而吟或被髮而嘯或鹿裘帶索而歌要之其中皆有所負而未庸故緣此以自洩而世以恒度測之遠矣若公者母亦有所負而欲洩也歟良可悲已所著有閒居集十二卷雜集二十一種行于世

提督四夷館太常少卿前南京國子司業訥谿

周公怡墓志銘

姜 寶

公諱怡字順之號都峯後改號訥谿世爲宣州太平人高祖端慶祖德夫祖全皆不仕父本秀號西疇西疇公初以公考推官滿贈如公官繼因 穆皇帝登極覃恩以公南太常少卿貴加贈中憲大夫母劉封太孺人又加贈太恭人公少遊邑庠中嘉靖甲午鄉試登戊戌進士初授推官司理順德以治行第一人徵選吏科給事中言事忤旨杖闕下仍逮繫錦衣衛詔獄時嘉靖癸卯六月二十七日也歷甲辰乙巳凡

三年 上用箕降神之言乃與前此言事同建紫侍
御富平楊公爵貞外郎泰和劉公魁並得釋未滿月
而 上爲箕神造臺太宰熊公浹極言不可然忘其
請釋三公也 上於是怒罷熊公爲民而復建三公
焉歷丙午丁未凡兩年而 內殿災 上親於火光
中聞半空有神語令釋三公於是三公者竟釋云公
歸猶得送母劉太孺人終自是家居凡十九年歲丁
卯肅皇帝賓天 遺詔還公吏科尋轉太常少卿未
及任改而北既任太常也又以言事忤旨外補山東
按察僉事戊辰轉南京國子監司業己巳復轉太常

少卿提督四夷館事未及行而疾作度不可行也托友人操江都御史吳公時來上疏以請疏爲少師石鹿李公所力阻不果上竟卒於家時隆慶三年十月十七日也公自諸生時即能有異獲不避溝壑不忘之志郡倅古冲李公督學介菴章公大司成白山倫公方舉業相知已奇公器識非尋常矣及爲順德司理書臯陶祥刑之戒時自觀省旁郡邑皆以神明稱其署府篆也適章聖太后國喪肅皇帝南巡省視陵寢之日駕往來境上諸供應取諸倉卒公一以身應之無不立辦也既而梓官從舟南行當有

協辦於他郡時則守既至視事矣卒未能辦公代爲
辦其事亦無不井井於是撫按其地者皆荐公卓異
才天曹授公吏科猶以資望當擢銓司適南畿員數
克溢不獲留爲恨居掖垣朞月而封事凡八九上如
謂巡撫論不肖不及方面文臣論郡守不及見任舉
令丞自矛盾舉境內人才濫及貪邪爲失體謂計部
本兵及司空三大臣皆不職宜亟罷謂文選考功二
司宜得人而久其任謂贈謚予奪失當出相嵩調旨
爲專恣而欺罔元旦日食昧爽前不及三分免救護
也謂少虧不如無虧救護可免修省不可無種種皆

疏論最後大臣不和被人黨比言官罷謫大敵在前而文武構釁皆非國之福爲三可懼輔臣竊威福吏部輕黜陟督撫辱將官而將官懷小忿誤大事爲四當戒蓋指相鑾嵩冢宰瓚總督翟鵬趙廷瑞總兵張鳳周尚文而意專在嵩謂嵩威靈氣焰陵轍百司中外不畏陛下而惟畏嵩尤人所不敢言嵩故多中黨激上怒摘疏中日事禱祀語爲訕謗於是被廷杖前後繫詔獄四五年志愈壯既起廢官奉常猶踞陳五事以仰答新天子之知遇一曰定君志二曰畏天命三曰敬大臣四曰擇左右五曰勤朝政時近

習用事之人以方導上宴遊公所言妨已也由此亦遂忤旨調外矣公既名高海內且自中朝清貴出宜薄外僚不屑事事也然在山東最肯留心職業暇則與僚友義河李公幼滋潁泉鄒公善時講授湖南聞者興起蓋東郡因公在庶幾還鄒魯之風焉其司業南雍也真能以身爲師而寶適承乏祭酒深愧糠粃在前故自予以及六館師生無不耆祭事公者後轉奉常當去爭欲請留而不能人以比唐陽公城然又謂陽公稍似激而公德器渾全實過之蓋公學聖賢之學非但節槩過人如陽公而已也嘗邇公問學

淵源所自其蚤歲師事東廓鄒公龍谿王公以二公
皆陽明先生高弟弟子欲因以窺先生之蘊奧而得
其傳既於傳習等錄皆口誦而身體矣然而公之心
未已也於是又旁求曲取上自宰執下至山林布衣
遠而數千里外近在鄉井間凡有道望可印證學術
者每往來辨難要歸於一是而不喜爲高而無實之
談故惟公之學能會知行於一條非窺言者比也性
甚孝居西疇公之喪及葬而廬於墓能盡哀以復古
禮奉母劉太孺人尤善承顏始論事必跪而得請乃
可獄中以書寄慰皆曲盡人子之情與二弟忤恪居

番老猶不忍分爨念族誼恐離散置祭田以展墓而
合食斛山晴川二公卒數千里吊哭於其家時輩傾
已者顧其人才可用猶薦之當道無幾微芥蒂於胸
中比垂殤口授子若弟遺囑猶謂生平以訐爲直傷
忤甚多戒子孫勿干有司祠鄉賢真所謂得正而斃
焉者歟公生弘治乙丑十二月年六十有四所著有
奏疏若干卷集若干卷並梓行

太常寺少卿傅公平林墓志銘

呂 本

公諱佩字朝鳴虛巖其別號也上世本汴人至宋從
高宗南遷遂占籍仁和高祖十二公會祖得祥悖信
好義邑令旌其閭祖諱延定父諱祺號實齋母姚氏
生二丈夫子公其季也姚孕公及期實齋公夢冠蓋
貴人造門簾而生公公生甫三歲而實齋公棄世母
鞠育訓課之童年即有志遠到經史皆通涉大義顧
數以病廢及冠始克專力於學補邑庠弟子員嘉靖
乙酉舉于鄉至乙未余閱其卷學博而識高大奇之
因薦列峻等同事者亦皆歎賞不置以爲真濟世才

也既而見其豐願修辭以然出群輩及與論國家利害生民休戚莫不了然胸中余心竊喜爲朝廷得人當是時公聲名籍籍傳播士林不特余一人知之而已未幾選授興化知縣公至爬垢剔蠹日夜皇皇求蠲民瘼其甚者軍竈奪民之田地而不稅不役民負累逃亡過半至困死無愬司軍竈者又深庇之而視民如讎前令不敢詰詰輒爲所構徃徃罷去公曰若是何以令爲吾奉天子命爲民父母民在倒懸而不知安能覩頽在位哉乃極言宿弊疏上於朝者三必行而後已雖沮撓百計至有擐甲以攻者公棘棘

持議益力卒還軍竈所攘奪於民首民乃甦田賦悉
平適余以從事過淮聞頌聲嘖嘖滿道路因折簡奇
之曰公可謂不負余之知矣民肖公保立祠于邑公
又以餘力修治學宮日群士子講說周公孔子以相
磨礪疏濬河流縈繞廻合如玉帶以啟鄆相之兆公
在興化三年百姓知公之心以爲恩上官知公之政
以爲績天下士大夫知公之才以爲譽於是 天子
知之召爲兵科給事中公亦知無不言言無不盡而
所以報 朝廷者不遺餘力矣 世廟幸承天公以
才望扈從有武定侯郭勛怙寵驕恣不法無人臣禮

國變之日即抗亂勢之忤旨奪職公聞命欣然就道
歸數年郊廟禮成得還章服公夙稟正直平生無脂
膏穢烈態又素有經濟天下志地方諸所利弊有可
以裨民生益國計者遇事侃侃論辨不少假聽者無
不捧手起敬以是觀風使者咸謂公宜大用前後薦
剡凡十四上竟不用 穆宗新即位廣開言路蒐羅
海內名士時巡撫趙公玉泉首薦公以應又以例當
引年僅晉秩太常寺少卿致仕向使不久處山林壯
志宏議獲竟厥施其濟世安民奚難嗟夫昔人謂士
果能自爲材耶公天性孝反事寡母色養兼至與仲

兄南橫公皓首相聚朝夕怡怡母及兄病嘗割胸股
肉和藥以進病隨愈敦睦宗黨婦喪患難咸力佐其
費如煮粥以活饑民施衣以庇啼寒施飲以濟道渴
種種善事皆彰彰在人耳目其濟世之意於此亦可
槩見云

太常寺丞張來儀傳

實錄

張羽字來儀後以字行更字附鳳本潯陽人刺史戡
之後元季倣擾徙家湖州領鄉薦授安定書院山長
再徙於吳洪武四年以儒士徵至京應對不稱 旨
放還再徵爲太常司丞俄坐事謫居嶺南未半道召
還自沉於龍江驛前羽博學好古文章精潔有法尤
長於叙事詩亦清麗作畫師小米所著有靜居集

太常寺寺丞金陵杜公環傳

黃佐

杜環字叔循，金陵人。其先本廬陵人，侍父一元遊宦江東，遂家焉。一元好交四方名士，多哀其詞翰，以教環。以是環博通經史，長於翰墨。其書法端妍，至於行草亦各臻妙。歲丙午，太學初建，環以儒士薦，被除學錄。以其書法示館之士，皆倣而式之。尋入侍春坊，大爲皇太子所眷。時天下以工書名者皆被徵而至，然流輩中罕見其比焉。故環之書名騰京師，學士大夫有所述作，借其書以取重。洪武改元，遷太常寺禮部，後爲晉王府錄事。終太常寺丞，爲人謹飭重然。

諸好周人急父友兵部主事常允恭死於九江其母
張氏年六十餘哭九江城下無所歸有識允恭者憐
其元告之曰安慶守譚敬先非允恭友乎盍往依之
母如其言附舟詣譚譚謝不納母大困念允恭嘗仕
金陵親戚交友或有存者庶萬一可冀復哀泣隨人
至金陵因訪一元家所在道上人對以一元已死惟
子環存其家直鷺州坊中門外有雙橘可辨識母服
破衣兩行至環家環方對客坐見母大驚頗若嘗見
其面者因問曰母非常夫人乎何爲而至於此母泣
告以故環亦泣扶就坐拜之復呼妻子出拜妻馬氏

解衣更母濕衣奉糜食母抱衾寢母母問其平生所
親厚故人及幼子伯章環知故無在者又不知伯章
存亡姑慰之曰天方雨雨止爲母訪之苟無人事母
環雖貧獨不能奉母乎且環父與兄恭交好如兄弟
今母貧困不歸他人而歸環家此二父導之也願母
無他思時兵後歲飢民骨肉不相保母見環家貧雨
止堅欲出問他故人環令媵女從其行至無所遇而
返坐乃定環購布帛令妻爲製衣衾自環以下皆以
母事之母性褊急少不愜意輒詬怒環私戒家人順
其所爲勿以困故輕慢與較母有疾疾環親爲烹藥

題七飭以母故不敢大聲語越十年環以養禮部奉
詔祠會稽還道嘉興逢其子伯章泣謂之曰太夫人
在環家日夜念少子成疾不可不早往見伯章若無
所聞第曰吾亦如之但道遠不能至耳環歸半歲伯
章來是日環初度母見少子相持大哭環家人以爲
不祥止之環曰此人情也何不祥之有既而伯章見
母老恐不能行竟緇以他事辭去不復顧環奉母彌
謹然母愈念伯章疾頓加後三年遂卒將死舉手向
環曰吾累杜君吾累杜君願杜君子孫咸如杜君言
終而絕環殯而葬之歲時常祭其墓學

十宋志爲環傳其事云

太常寺寺丞贈太常寺少卿柳庄袁珙墓志銘

姚廣孝

永樂八年歲在庚寅十二月五日承直郎太常寺丞
柳庄袁先生卒于家計至京明年辛卯正月二十二
日其子中書舍人忠徹奏聞上爲之哀悼賜鈔六
百錠營葬事遣中官祭于其家二十四日忠徹傳奉
敕旨命臣廣孝撰先生墓志上謹奉命按吏部員外
郎臣陳宗問行狀先生諱珙字廷玉姓袁氏系出南
昌世多聞人宋南渡有諱子誠者知臨安府兼大宗
正司丞扈蹕至鄭遂家焉其孫鏞以進士死忠於德

祐間曾祖諱景安登進士第祖諱衍隱德弗耀考士
元文林郎翰林國史檢閱官博學能文器量恢廓性
明果義有所不可則奮力正之故鄉閭以忠直稱初
衍無子以弟澤民承後澤民仲子士元謂弟無繼兄
之義白於有司奉澤民歸宗而已爲衍子俾得倫序
不紊自號菊村先生實德祐忠臣之嫡孫也生于四
人曰珙曰珪曰瑛曰璟珙即先生也先生性剛毅直
方不泛交於人安貧養志當勝國之季勵精儒業九
流百氏之書靡不涉究然時與願違遂游歷湖海間
遇異僧古崖於補陀洛伽山一見而奇之因授以相

人訣期先生後必以術顯先生決人貴賤壽夭禍福
休咎如指諸掌凡求占者必先察其心志聽其語言
次觀其形氣然後斷以吉凶規以忠義雖達官貴人
遇之不以禮則拂袖而去聖朝放還天下和平先生
乃歸鄆城之西韋新其先業所居前後皆樹以柳扁
曰柳莊鄉之人皆稱爲柳莊先生洪武間 上在潛
邸聞先生名遣使以幣禮聘焉先生即拜受即沐浴
戒行李而起及見 上大悅先生於是肅恭而前凝
神佇思俯仰左右一日而盡得矣先生再拜稽首而
言曰 聖上太平天子也龍形鳳姿天廣地闊重瞳

龍髯二肘若肉印之狀龍行虎步聲如洪鍾實乃蒼
生真主也但年交四十鬚長過臍即登寶位時上
雖聽其說而未全信居無何先生辭還故里錫賚殊
厚洪武三十五年壬午六月十七日上嗣登大寶
萬幾之暇因感先生昔言之驗若左右券於是敕遣
內侍驛召至京拜太常寺丞授承直郎待以特禮賜
冠服鞍馬文綺鈔錠及居第在京以便其老上巡
狩北方己丑冬十月尋有旨召至行在先生即日就
道東殿特念其衰老非霜露所堪於是賜貂裘安車
而致遣焉既入賜獎諭有加已而得請展省先塗復

敕驛置歸其鄉及先生卒上賜鈔營葬事遣中官
祭於其家復敕臣撰墓志先生卒時年七十有六先
生平日篤于孝友親疾革則焚香願天減已之年以
益親壽疾果差人以爲孝感所致暨失怙恃哀毀過
禮先生時厄於貧襲衣衾棺廨爲之必竭其力出是
禮無不脩宗族之貧乏者恒啻已用以賑之弟妹之
孤娶者咸推恩以撫之有嫁娶之不能者出財力以
相成之先生與鄉黨也正而不群妻子也嚴而有禮
交朋舊也以信義而不阿卹患難也救之惟恐不亟
人有以役當徙而委之金百鎰不相聞者餘十年及

其歸以金還之封識如故友人以事逮于疫者與之
能贖先生收厝以歸其母先生臨利害一以理勝
無顧忌趨避其忠義正大如此先生好爲歌詩與客
燕飲酒酣擊缶仰天豪吟人以爲康節先生也先生
知命之終屬續之日怡然如常溘爾而去故鄉閭父
老及所交游者罔不悲嘆公卿大夫士走哭奠祭者
踵相接于道平生剛方中正學純行端綽有古君子
之風於是 皇上見知特加禮遇豈惟其技術之精
妙而致然爾昔袁天罡父子事唐太宗名著方策以
爲希世之有今觀先生與其子忠徹際遇 聖天子

始終恩寵莫大之榮顯豈天罡父子可能跋及者哉
先生平日相人之奇驗九靈山人戴良傳脩詳茲不
復繫

袁太常珙相術之妙在勝國時已擅天下洪武初姚
少師廣孝爲縉流寓嵩山寺珙一見卽以匡輔器期
之曰公劉秉忠之儔也後廣孝以高僧選入燕邸預
密謀言珙於王王亦素聞其人乃託以珙名諫尺
籍遣旗勾取既至未卽得見陰命選衛士長身多髯
貌與王類者九人王雜其中俱微服適市拉珙入酒
肆飲王位列第三珙遽前引其裾俯伏呼殿下衆

陋其妄珙言愈切 王即起還宮召珙入見珙曰殿

下千里召臣而於酒肆相見乎問何以識對曰殿下

入肆時手操弓矢臣望見知之皮皺而瘦龍掌無肉

也

世所傳辨宰相於嵩山佛寺
議真主於長安酒家者即此

更使詳視因極道天

表之盛曰年交四十髯長過臍當登大寶必爲二十

年太平天子王悅由此遂決大計珙留燕城未久遇

列校散卒多以公侯大臣官許之語徃徃流播 王

恐有他虞因遣還鄉其後渡江登極驛召至京拜太

常丞賜與甚厚及議建儲 上意有所屬遲回累年

使珙相 仁宗曰後代人主又相 宣宗曰萬年天

子於是國本始定他日見 仁宗於東宮問曰吾壽
得幾何曰過七七之年天福無疆及乙巳鼎成竟如
此數云子忠徹亦傳其術官至尚寶卿

南京太常寺卿徐初傳

以王南京

實錄

南京太常寺卿徐初字復陽浙江會稽縣人永樂中
由舉人授山東濰縣教諭秩滿擢戶科給事中洪熙
元年陳治道十事皆見嘉納賜金織文綺陞都給事
中宣德間陞大理寺卿中官姓阮者守遼東失利侍
郎柴車按其當死者三十餘人初奏當誅首惡勿濫
及非辜工部侍郎羅汝敬巡撫陝西坐事出官遇赦
吏部輒復其官言官劾以爲黨罪應死初曰是特失
覆奏耳吏部因得釋初爲寺丞楊復論事不合被劾
俱下獄宣廟特宥之正統初調南京太常寺卿尋

致仕景泰三年七月卒于家初爲人孝友寬平出言
未嘗忤人至於論事決疑侃侃形於色及卒朝野惜
之

南京太常寺卿愧齋陳先生音神道碑 倪岳

弘治甲寅六月二十有六日南京太常寺卿莆田陳先生以疾卒于長安西街之第先生諱音字師召姓陳氏別號愧齋世家閩莆之涵江宋明州觀察使淬與子仲剛俱死靖康之難旌其里居曰忠孝坊則涵江之祖也曾大父宗義大父光遠父崇澄號耕樂俱有隱操以先生貴初贈耕樂翰林編修進南京太常少卿妣黃氏亦自孺人進恭人先生生而敦朴嗜學少長補郡庠生有文名牟都憲俸時僉閩臬一見奇之遣諸子從之游舉天順壬午鄉薦登甲申進士第

入翰林爲庶吉士成化乙酉簡授編修丁亥預修

英廟實錄成賜白金文綺進祿一階壬辰乞歸省墓

賜寶鏤爲道里費丙申滿九載陞侍講入侍經筵辛

丑同考禮部會試癸卯擢南京太常寺少卿弘治己

酉南京翰林學士員缺命兼掌院事壬子滿九載始

進今官僅越二載遂得疾以卒先生天性孝友痛二

親不逮祿養每忌日悲泣不自勝仲弟祖理家政爲

翰粟給遺授以冠帶季弟員事舉業親爲指授遂領

鄉薦叔母居孀力爲贍給遺孤子女爲之婚嫁族里

之貧者周恤恐後平生和易坦率與人交誠意懇切

或與論事知莫可如何率曰也罷人遂以此稱之弗校也至其操履則剛介堅定不爲勢利屈在翰林時西廠初建方用事其爪牙韋英者乘之鼓扇密捕兵部主事楊仕偉于家并箠掠其妻事叵測人皆閉門避之先生與之隣即登墻大呼曰汝何人斯非奉上命敢擅辱朝臣耶其人詰之曰汝爲誰而言乃若是復抗聲曰我翰林侍講陳某也懼汝輩壞國法禍福非所憚其人爲之少戢在太常時守脩中貲寃理樂器歲久損失益多欲歸咎先生然實無預也同事者亦密喻俾少俯就先生與之抗禮益辯論不顧其

人怒甚遂併劾于朝所司覆覈卒無所及蓋仁者之
勇其不可奪率類此居官詳慎於義所當爲不遺餘
力爲編修疏上時政十事皆切治體時論韙之及任
卿佐於凡祀享薦獻必躬爲閱視務竭誠敬舉用僚
屬一秉至公人不敢干以私先生素明經學四方之
士爭欲出門下京邸至不能容經其指授往往取高
第嘗有一登其門兩魁多士者則先生造就人才可
知矣今太常齊卿章春坊王諭德鏊皆顯名者其他
布列中外尤多所作詩文肆筆而成畧不構思南京
士夫公卿之家凡有慶弔之禮必藉一言爲重委幣

而諸君無虛日焉先生始入官余忝同其得朝夕聚處談經論史未嘗少間至相約適爲主以會箴規之資切磋之益親芝蘭而醉醇酎者久矣及官於南書問往來不絕嘗遺幼弟從之游教愛深篤蓋先生之處友久而益敬忠信篤厚非他人所能及而今不可見矣每緬閱篋笥見其遺墨爲之愴然嗚呼惜哉先生以正統丙辰三月十有七日生春秋五十有九

興化府志

音爲人和易坦率細事無可不可至分別義利則界限截然在翰林時嘗上疏陳時政數事劄宜不阿權

瑄黃賜有母喪省寺院監成赴弔翰林亦有倡議欲行者音詹曰堂堂翰林相率而拜內監之門奈天下笑何議遂止大學士劉吉起復音移書止之其後當路有缺吏部欲擬音吉日陳某腐儒也不可用其爲少卿滿九載乃進卿音問學深博爲古文肆筆而成率平實有理致遺藁累十卷第員鄉薦常州府通判子舉鄉薦華正德戊辰進士孫湏樂鄉薦歷和平知縣性謹愿凝重故友某貧甚求佐湏樂索篋中屢空乃以一銀酒竿應之不令內人知其隱德足尚矣湏孝蔭叙歷承天通判

南京太常寺卿呂憲傳

實錄

呂憲字秉之翰林學士贈禮部左侍郎謚文懿原之子也以蔭錄爲國子生成化初又以東宮恩授中書舍人仍上疏乞應試遂薦京闕中書舍人之得應試也實自憲始秩滿遷禮部員外郎郎中擢南京太僕寺少卿改通政丙辰擢太常寺卿正德丁卯始致仕閱四年卒詔葬祭如制憲爲人坦易喜讀書作詩又習聞典故文與行能世其家

呂憲字秉之浙江嘉興府嘉興縣人父原爲內閣翰林學士贈禮部右侍郎謚文懿憲有異質書過目成

誦未成童精故訓尤善度時事多幽中文懿奇之既
文懿卒英廟念輔導功推蔭補國子生成化丁亥
授中書舍人猶刻志文學居常手不釋卷謂詩必經
指授乃中矩則時黃巖謝方石詩有盛名遂就學謝
稱其所就非時輩所及爲文章務學左傳史記唐宋
諸大家弗屑也或時獨坐朗誦史漢中警語首肯沉
思客至若弗聞或戲其志太高曰取法乎上斯得其
中顧不以階身科目爲恨曰先公所期待我者詎止
是哉乃䟽乞應試報可言者劾其非例憲宗特允
之有朕念呂憲儒臣子孫有志科目之論遂中順天

辛卯鄉試時中書員多雜進獨與石淙楊公一清相友善兵部事有與中書當會行者恃柄臣勢不復關白同楊論之得旨悉仍其舊秩滿遷主客員外郎石淙曰子攻文墨吏事非所習盍慎諸憲曰歐陽子文章不少夷陵之閑曠曹司故有部案皆吾師也已而能聲勃勃起公卿間進本司郎中琉球國乞歲一入貢謂子之事父定有不可問其意實利於賈市以自便耳廷議難之而患無辭憲請折之云若知父子之禮當從父命衆服其言西夷回回奏乞取廣東道歸國朝廷將從之憲執不可曰西域貢有常道更之恐

有他釁且經涉江海萬餘里勞費將不貲途寢其奏
丙午以薦擢南京太僕寺少卿建白處置操備馬匹
免徵首種種子諸四事以公務之京師又上言立誠
信習禮樂尊前王表英靈凡十有二事多見采行故
事太僕馬數不得爲人所窺文卷例不刷浸以磨滅
登耗無所於考憲曰他官不相涉是也太僕所掌何
事而可不與知乎乃建白凡馬政卷許太僕官三年
一照刷以爲例弘治中改南通政進太常寺卿祀事
多更張卷牘浩穢至或相牴牾又采輯累朝沿革爲
條例若干卷事至按而行之至今賴以無誤正德丁

卯致仕大學士楊一清稱其志存澤物而久官閒散
不克自展布其政事終爲文學所掩云

南京太常寺卿矯亭方公鵬生墳志

方鵬自撰

先生姓方氏名鵬字時舉矯亭其所自號遠祖萬二
元海運提領仲子富代之洪武中官錄其產謫戍于
遼富兄德又以析居不與其難德又生榮榮生文貴
鵬之曾祖也祖槐庭府君諱盛始業儒教授鄉里以
高年懿德膺冠服與鄉飲父節菴府君諱麟例授福
寧州幕賓贈承德郎禮部主事詳見大宗伯領公詩
臣新建伯王公守仁所爲志表母封太安人公以成
化庚寅三月二十二日生昆山南新齊里長以明經

補舉學生領弘治辛酉鄉薦第二名不赴會試開門
士徒自遠方來者彌衆正德戊辰與母弟鳳同舉進
授高等任南京禮部主事丁外艱服闋改南京刑部
陞員外郎郎中丁內艱服闋改南京職方道聞逆藩
之變蕪程赴難適車駕南巡脩嘗辛苦調南京文選
所至頗舉其職言官交薦陞浙江布政司左叅議瓚
辭不允歲餘又以言官薦陞山西按察司副使提調
學政與部使者語不合意即棄官而歸累躋得允致
仕自是屏跡田野放情丘壑嘉靖丁亥又廷臣撫臣
薦召爲右春坊右庶子兼翰林院修撰仍階四品克

經筵講官主考順天府鄉試復克廷試掌卷官編纂
御劄同修會典陞南京太常寺卿三疏得准養疾未
幾有忌我者非劄削去新銜終身不錄忌我者罷臺
諫薦劄交上而先生病且老不可用矣所著矯亭存
稿責備餘談續觀感錄紀元嬰覽行於世崑山人物
志名臣節錄藏於家先生受氣甚薄操心素危力不
足以任勞學不足以阿世故王者怒之以爲慢法而
不武滯而不化悒鬱而不舒故達者病之以爲拘平
生無他玩好惟耽嗜經史殆忘寢食故逸者憫之以
爲癡赴人緩急若拯溺焚或其人以怨報德亦不中

止日用不給未嘗輕以干人人或告乏則傾囊而與之弗吝故智者笑之以爲愚晚嬰疾痛杜門謝客不入城府而躬慶弔故責備者罪之以爲闇其爲人如此不足以當名筆之銘謹目述履歷如右他日納之壙之中足矣葬某年月日則虛以俟

南京太常寺卿牛公鳳墓志銘

張壁

公諱鳳字道微別號西唐先世上黨人避元亂宗人
散居河南高祖諱大占籍于葉遂爲葉人大生廣廣
生貴貴生麟世有隱麟生鐸公考也始起家爲陝
西隴城巡檢後以公貴封吏部驗封郎中公生而端
凝恂慈驗封公愛之長隨任乃遯方寡文學士公志
向學顧無書凡購得諸家盡讀之了其大義後任滿
還歲大侵乃僑居南陽驗封公謂公曰吾以薄宦歸
汝能力學成名吾無憾矣公由是刻厲入學爲諸上
驗封公卒家益落公依季父和以居雖窘甚志不少

裴乃正德庚午舉于鄉辛未登進士第時冢宰遼春
楊公考選諸進士爲給事中獨奇公卷留授驗封主
事滿考陞驗封員外郎郎中時沐國公薨其子景欲
自滇襲爵當路者爲請公曰沐氏世爲守臣自祖
宗朝皆陞見請襲并謝今若是與海外諸國何異卒
從公議時錢寧用事嘗挾勢囑索吏人冀得更代後
厚賂公喟然錦衣金吾要官顧爲羣小囑耶竟不與
部中事無纖鉅必執例以行冢宰晉溪王公稱公爲
執法吏武皇帝南巡公率僚衆抗疏諫詔赦之廷
濱死今上登極錄言者功陞公俸從四品己卯轉

考功郎中公悉心承襲不爲毀亂真冢宰白巖喬公
一日出一帖云茲實鑽刺得官者公視之曰諸固不
能盡知中二人皆九年考滿陞級非速化者喬公大
駭怒投帖者因命公詳覈之留者太半愈益重公久
之陞南京太僕寺少卿尋調太僕寺少卿奉勅督畿
內馬政公振頽修墜馬政大舉陞南京太常寺卿公
益寅清飭修祀事神樂觀隸太常故事錢穀俱免覈
公召知觀語之曰祖宗優若曹甚厚予故不檢括
顧可諉不知乎乃粗爲立法歲積羨米四百石復命
量給觀中老弱校閑者人人感悅己丑夏會奉大門

臨叻災詔兩京堂上官自陳公遂上疏請休 上可
其奏乃納祿歸所忤當國者乃以前神樂觀餘羨誣
公公援律奏辯得白既歸生產置不問即小築城南
以居與其子第日講誦其中倦則登眺游行嘯詠終
日有詩惟興所至而止平生少病一日晨起偶瞑目
若悶暈狀家人驚掖已不能言端坐而逝享年七十
有五配任氏歸公時室懸磬僅備釜爨宜人躬薪水
績紡以佐日用子若女雖孩提言色不少假嘗曰凡
不肖子皆母匿不父聞致終失教耳及公貴俸入漸
豐惟儉勤如故封宜人先公卒

南京太常寺卿贈禮部右侍郎謚文簡穆公孔

贈墓志銘

王道

嘉靖己亥八月南京太常寺卿玄菴穆公以疾終於
家計聞士林驚嘆 上悼念經惺儒臣詔贈禮部右
侍郎謚文簡遣官諭祭兼管葬事蓋脩數也公諱孔
卿字伯潛自號玄菴山東堂邑人曾大夫弘潞州訓
導妣南氏大父彪朴菴處士妣任氏父清耆儒妣任
氏繼黃氏公既貴貤恩初封父徵仕郎翰林院檢討
贈妣孺人繼贈大父父皆通議大夫南京太常寺卿
祖妣妣皆淑人公少穎悟敏重未成童即文章奇古

識者所需年十八遭母任淑人憂哀毀啜血以養
喪聞弘治甲子舉山東鄉試第一乙丑登進士第授
簡爲庶吉士讀書中秘丁卯授翰林院檢討己巳預
修孝廟實錄成忤逆瑾意調南京禮部主事瑾誅
還舊職辛未同考禮部會試壬申遷南京國子監司
業癸酉以外艱歸服闋改北監司業尋丁繼母黃憂
服闋改翰林侍講克經筵講官嘉靖紀元壬午主順
天鄉試乙酉預修武廟實錄成陞左春坊左庶子
兼翰林院侍講學士修武官續黃丙戌主考武舉公
凡三執文柄皆號得人試錄出議者輒指其深于理

者曰此玄菴筆也已而果然是厥入直便殿日講公
既以經術侍謂足以行也因摭所得發爲講義簡明
剴切寓誠規諫聞者皆悚敬焉未幾進掌院事兼撰
文官誥勅首遵 聖諭崇雅革浮遂定爲一代詞命
之體其寅冬十有二月 上於文華殿奉安先聖先
師神位因諭言臣人各陳經書大旨一章冀以不負
所望於是公獨取孟子卒章發其見知聞知之奧以
祗若 聖天子纂承群聖之志篇末獻言指切時弊
則所謂啟沃交修之實目前緊要之事以仰副 聖
明之望者也大略謂用人者不肯體 聖心布公道

使私求者易進直道者難容由是內外大小臣工罔
不改操趨時道化未洽皆由于此故欲用人之得其
當在聽言之致其審偏聽則蔽蕪聽則明以一人愛
憎之口爲人才邪正之據此用舍之際或有未究於
理者矣奏入聞者竊之明年春某月日公已赴闕候
請以陰雨免朝隨衆而回俄聞 上御文華殿亟馳
以趨已不及矣即上章自劾明日得旨改南京尚寶
司卿舉朝駭愕給事中葉洪上言穆某聖代淳儒留
之左右必足以裨益 聖德不報公惟循省自咎無
幾徵見于顏面壬辰轉南太僕少卿癸巳遷南太常

寺卿公德望隆重善類桂先自爲學士至官太常凡
十擬侍郎皆不舉用然益昭輿論之有在矣甲午夏
以疾自陳得致仕歸公自是杜門靜養與世相忘而
望實益彰薦剡交上朝野頤頤冀其復起不幸天不
憖遺奄忽至此嗚呼悲夫公資稟既純問學尤速初
留意古文詞已嘗闕其奧矣既知其無益棄不復爲
乃篤志正學研窮義理體之身心其所造卓然處可
與儒先君子同不謬於聖人而公不自以爲足也嘗
謂古之人窮理盡性以至於命今於性命之原習其
讀而未始自得之也顧謂有見安知非汨慮於俗思

也邪於是抉去藩蔽力肆恢弘經訓之外雖世儒所
斥以爲異端如佛老者悉取其書精擇而詳說之以
與吾聖人合曰性中固無是分別相也又之洞見道
原通達爲一嘗論心學之要曰鑑照妍媸而妍媸不
著於鑑心應事物而事物不著於心自來自去隨應
隨寂如鳥過空空體弗碍觀此則公所得信乎玄矣
故其見之行也無事矯飾而中正純懿自中禮則孝
友之實取重鄉評忠信之德孚於朝著在南雄時父
封君適患風疾公左右醫藥食寢俱廢及卒柴毀骨
立殆不勝喪後喪繼母亦如之有穿人人相繼天逝

公哀悼之久而不置子其孤遺皆至成立宗鄰姻友
姻睦周至不以貧格思教人每薰以和人一親之故
及門之士多所成就立朝雖久而位不稱德未究厥
施然志操雅正宇量深沉當事變揮霍波瀾反覆之
際人多不能自持公處其間超然無預確乎不移泊
如也同時縉紳無間趨向同異咸宗仰之以爲不可
及知德者至擬諸程伯子云晚年病脾不能食者數
月而神志益清文思煥發皆爲其自得之妙有塵垢
斯世遨遊太清之意其於死生去來蓋亦脩然庶幾
孔子所謂聞道者夫公所著述有讀易錄尚書困學

前漢通紀諸史通編遊藝集各若干卷其大學千歲
玄菴晚稿則病筆也生成化巳亥正月十六日享年
六十有一

南離志

黃佐

穆孔暉字伯潛山東堂邑人少端慤寡言博覽經史
有深湛之思弘治甲子有詔用洪武舊制以京職
兼主各藩試事主事王守仁校文山東置孔暉舉首
時論稱得人焉乙丑連取進士改翰林庶吉士除授
檢討每玩索有得輒輯成編同館崔銑見之嘆曰橫
渠妙契疾書今復見矣正德巳巳逆瑾用事惡翰林

儒臣不附已因纂修後以擴克政務爲名調南京禮部主事庚午召復檢討同考辛未會試所得多知名之士壬申陞本監司業既至以身率諸生惟令靜默窮究義理毋瑣瑣口耳記誦中人以上類多從之癸酉改北監羅艱歸然後被教之徒思模範如孔暉不易得也服闋改翰林侍講在經筵進講經書多所規諫嘉靖壬午主考順天鄉試簡拔尤精尋歷春坊庶子兼侍講學士太常寺卿仍兼學士卒贈禮部右侍郎諡文簡孔暉天性好學雖王守仁所取士未嘗宗其說而非薄宋儒晚年乃篤信之深造禪學頃宗臨

茂作偈有到此方爲了事人之句論者以此窺公所
詣云所作詩文精確不苟在南監時宅中多竹吟詠
有得輒題其上後郭維藩爲司業南行贈之以詩有
句云書聲山下月詩思竹邊秋崔銑謂玄菴一聯摸
寫臻妙境矣每舉以爲詩家三昧云玄菴蓋孔暉別
號也

南京太常寺少卿鄭雍言傳

實錄

南京太常寺少卿鄭雍言浙江鄞縣人由進士爲翰林院庶吉士與修性理大全書成授中書舍人轉行人司副仁宗監國南京時每被命作詩文遣詞無滯仁宗喜之且謂其楷字端嚴類其爲人宣德間命於內府教內使書尋陞河南按察司僉事仍留內府供事上初即位始遣就職秩滿陞太常寺少卿雍言性謙謹與物無忤文思豐贍尤工篆書日應四方之求無吝色景泰元年五月卒

南京太常寺少卿夏瑄傳

實錄

夏瑄字韞華湖廣湘陰縣人贈太師謚忠靖原吉之
子年十三以父蔭爲尚寶司丞後以母老乞就養改
南京尚寶司天順戊寅陞少卿秩滿陞南京太常寺
少卿仍掌司事成化十七年二月卒年六十四計聞
賜以祭瑄少頗豪放喜議論亦頗能屬文大臣蔭叙
子能問學者惟瑄及楊士奇子導知名子崇文舉進
士爲南京吏部郎中

南京太常寺少卿鄭環傳

實錄

鄭環字瑞夫浙江仁和縣人天順庚辰進士及第授翰林院編修預修英廟實錄書成遷修撰修續資治通鑑綱目轉司經局洗馬未幾擢南京太常寺少卿至是以三年考滿入朝卒于旅寓時成化十八年四月賜以祭如例環性方介自守有所不爲爲文不尚華藻所至與人多不合其在太常寮案頗不堪之然無他賜人亦不深咎云

南京太常寺少卿劉公稱行狀

公諱稱字務教系出漢長沙定王發次子安成思侯禮之後號荆山劉氏由荆山析居永新之藥湖由藥湖徙城北公之曾祖諱元杰贈工部右侍郎兼翰林院學士妣歐氏贈淑人祖諱髦以易魁鄉闈隱德教授學者稱石潭先生封翰林院編修妣楊氏贈淑人留氏封太淑人考諱定之歷仕正統成化間以禮部左侍郎兼翰林院學士入內閣典機務卒贈禮部尚書謚文安妣賀氏張氏贈封俱淑人公賀淑人出也兄弟八人於行居三成化八年以任子恩例授中書

舍人進階徵仕郎爲中書十年陞大理寺副食其俸
仍掌中書科事又四年陞南京尚寶司丞弘治八年
丁繼母張淑人憂服除陞南京尚寶司卿進階奉政
大夫正德四年逆瑾竊權罷歸田里明年瑾敗詔起
用公復補任如南京公是年以病告特授中順大夫
太常寺少卿致仕歸數月而卒正德九年十月十
二日也年六十有三公天資純朴習聞祖父之訓而
謹守之歷官四十年寅畏小心始終一節以是無憾
於公議中書命曰盡心所職勤慎可嘉尚寶命曰才
識優長性資謹厚皆其聲實足副云方逆瑾欲去不

附已者易以他人使恩皆出其私門有以賂得免反
超遷美官者或以諷公公曰吾豈可以辱吾先聲故
公之遭廢而復起也人皆榮之家居昧爽詣祠堂焚
香展拜即就張淑人寢所省候起居屬有疾疫家人
多出避獨供湯藥不離左右及其喪之日哀毀如禮
與實生已無異四時家祭一遵成規行之遇忌辰尤
悲不自勝接人謙厚質直一出於性然不爲矯飾以
徇時俗其言語訥然若不出口至論先朝古典古今
人物出處則各有條緒娓娓不倦五任皆職清務省公
暇坐靜室閱載籍以自廣吟詠極有典則作字雖倉

卒不爲行草其別號曰拙菴晚年更號歸田叟石潭
文安二先生學行著天下天下樂道景慕盖有願爲
執鞭而不可得者及接公之容儀而聽其言說則莫
不起敬以爲前輩之風韻猶可想見於斯也公可謂
能世其家者矣

太常寺少卿夏公良勝墓志銘

歐陽鐸

南城夏氏相傳出真州制置使貴之後君名良勝少穎異漸漬家學又經鄉先生圭峯指授爲文辭警拔不群丁卯虛齋蔡公視學至建得卷奇之拆視乃君訝曰子異日爲良臣無以勝矣改名曰良勝而字之曰干中是歲舉江西鄉試第一人明年第進士觀政工部尋丁繼母王憂又明年丁父愚夫公喪壬申起復至吏部議補科道鄉人適操司事有言宜用贊候之君不可干因贊其決授牒二日補刑部主事君略無悔也日與諸曹講求法比公暇與干七人者爲文

平會癸酉調吏部文選司主事一切饋遺無所受非
其人雖求一見不可得甲戌同考會試乙亥轉稽勲
員外郎丁繼母程憂程事愚夫公僅兩月遺命屬君
尤切君以故特慟素不悅者造作口語謂匿喪俟陞
其傷德亦甚矣服除以原職召補考功司庚辰彬賊
蠱惑先帝南巡中外訥訥君與進賢萬汝信連署
論之下詔獄拷掠毒至不死矯旨廷笞之垂死矣卒
以不死類有護持者云落職歸家設講授生徒創祠
增置祭田始作家譜推分業以居諸姪郡大夫聘修
郡志數月成稱有史法今上即位還諸言者君乃

補考功員外郎人材賢不肖地方險易事與革所宜
莫不廣詢備記太宰白巖喬公才之特奏補文選郎
中君惟公惟清於資格外時有超遷莫不厭人心裁
抑僥倖士風爲一振陞南京太常寺少卿未行爲嶮
人所詆亦曾當道什憾降知茶陵州三年政成有漢
吏風俸薪悉入公帑時疑其矯君曰良勝待罪臣也
此寧足贖耶戊子 詔發爲民明年讎摘議禮稿以
聞逮至繫臺獄三年謫戍遼陽三萬衛遼士從者數
千人時作爲歌詩殊有自得語丙申十月病脾越二
月望後一日卒後二日詔至不及聞悲夫距所生成

化庚子十一月二十六日年五十有七

南京太常寺少卿黃公重墓志

黃佐

國家必有愼憲炳發之臣獻納匡拯而後中外賴以
又安正德之季忠賢滿朝若吾廣毅齋黃公其人也
公諱重字子任南海人正德戊辰進士授行人羅外
艱歸服闋復職壬申使伊藩葬祭事竣卻其金帛
鞍馬行至懷慶遣人馳投復卻之筮任之初行已蓋
嶠如也癸酉使遼東勞夷人却鎮巡例贈如使伊時
甲戌以績最擢戶科給事中巡視內十庫光祿寺宿
弊俱革乃建言重名器久任用慎薦舉省權課四事
戶部奏從所省商旅稱便已而清理畿內倉場權貴

避焉丁丑復以績最獲賜恩父母時左都御史彭澤坐夷情削籍公奏請寬宥以昭往功輿論隨之尋進兵科右給事中考選京衛武官淑慝罔弗當者會

教皇帝北巡迎駕有勞賜金幣數事遂疏乞歸省復賜寶鏐行庚辰復任尋罹內艱歸癸未服闋補吏科右給事中市魁李陽鳳挾中官勢恣爲奸利方付刑部俄改錦衣獄尚書林俊執奏不聽乃疏慎政令以固治安會災異修省復疏詔令不常爵賞太濫聽言不弘營建不節言甚剴切聞者危之甲申夏進兵科左給事中太監潘真出鎮荆湖違例丐請公封駁不

選秋以言禮杖千 午門外尋進戶科都給事中賜
金幣寶鏹丙戌克武舉考官丁亥畿內饑䟽請賑濟
詔行其言多賴全活入侍經筵擢南京太常寺少卿
先是三擬進秩皆不報久乃獲遷此蒞事幾往尉役
人受其惠已丑星變以自陳致仕忌者快之公論惜
焉時同年呂柟謫金陵嘗書喬岳大川氣象青天白
日襟懷以贈歸構草堂刻柟書以自況云公平居和
易諧謔然嫉惡向義則勇奮不顧有姊適曾氏而貧
每損貲贖還其產業同僚張漢卿落職貧甚瀕行傾
囊贖焉鄉之漁民有官責其逋課垂死者見即爲之

代償潘伯通等十人誣陷盜獄爲白其寃皆得釋他
如革橫刷之舟築捍滂之牐鄉人頌德輒自遜謝其
行誼類此巡撫錢如京疏請起用而公已卒嘉靖己
亥七月年六十有二計聞上遣官特賜諭祭

南京太常寺少卿汪公佃行狀

公諱佃字有之姓汪氏系出徽州越國公華之後子孫自徽徙江西之貴溪再徙弋陽世爲弋陽人曾祖諱志福領永樂庚子鄉薦官岷府教授祖諱仲端累贈禮部左侍郎考諱鳳貴州布政司左叅政贈禮部左侍郎妣祝氏封淑人生五子長悞工部郎中次佑不仕次俊禮部尚書次偉吏部左侍郎公其季也初父兄擢門戶太盛爲公擇今名曰留少子力畊自給耳公顧奮曰兄輩能讀書進取我獨不能乎以易領弘治戊午鄉薦屬叅政公遭疾而諸兄宦遊公日侍

湯藥不離側暨遭考妣喪先後殯葬如禮用是久滯
然益得肆力於學正德丁丑領南官薦廷試賜進士
出身第一選爲翰林院庶吉士己卯授編修階文林
郎庚辰同考會試所取多名士乙酉以纂修實錄成
陞侍讀丙戌克經筵講官敷陳啟沃多所稱旨有白
金文綺之賜是歲復同考會試秋奉勅校書闕中
尋爲要人所沮不果行自是假考選翰林謀擢公去
矣初擬陞四川叅政遼庵楊公曰朝廷日親經筵
方欲求賢汪侍讀賢者也豈可使外補乎擢者顧益
甚十月復入講尚書皇極敷言公依蔡傳衍義不明

言君臣一論蓋君道在皇極中已弊者因密奏云汪
佃講書無君臣倫蓋譏訕也且佃乃前禮部尚書後
吏部侍郎偉之弟云如擬落職通判寧國府弊者陽
以好相送且窺公見公談笑如平日諸兒誦聲不絕
不覺自失有悔言在宣州閉門省過不與民事上下
默受其庇諸生暨屬吏之子從游講學者三百餘人
彌年咸克然有得宜俗尚巫覡喪葬多非禮自公之
講學也務以孝弟禮義爲教俗漸移易已量移松江
府同知同知職清戎公行其所無事戎清而民不擾
沿溯江常患水寇公下令通水處各爲門時其啟閉

盜不得恣睢公久淹郡邑宦情已微至是聞詹宜人疾篤遂拂衣去有部使者銜公因劾公擅離職未報而南京宗人府經歷之命下矣公曰吾歸及與老妻訣足矣因繳還經歷告身家食待罪辛卯被劾事白有旨復職時宗伯公尚存公不忍離雅有終焉之志已未臺諫舉天下遺賢數十百人而起用者僅十許人公與焉丙申春北上道改南京禮部主客司郎中尋出爲建寧道按察僉事在閩三年政不苛而事集部使數薦之建有髡而俠者小民逋負輒致之桎梏簪禁官司無能誰何公立寘之法斥散徒從毀其廬

舍百姓莫不稱快公嘗薦得浦豪黃姓者惡狀郡縣
不能捕公使人謂曰汝無久竄誠畏死第出我痛懲
以觀其後可也已而自縛至公愆誠而遣之其人遂
率化富人張某爲賊所殺賊不得或疑其姪利所有
而戕之公薦寃無狀讞之部使而建守受反間必欲
構之死地部使復下公議公曰殺不辜以媚人我不
忍爲也後部使代至卒如公議戊戌發礦事起公當
產礦地躬入山谷勞瘁特甚自是病矣嘗建皇華樓
閩敞雄峻爲一方巨觀功成而民不知費公自爲記
云又修建寧府志武夷山志人物志刻史漢異同李

建州集皆行於時己亥冬以考績過家明年春陞南京尚寶司卿秋七月陞南京太常寺少卿公素患痰火至是日就尪弱會災異策免大臣公即自陳求去得旨不允十一月復具疏乞休命未及下而公已卒于金陵寓舍時嘉靖十九年庚子十二月距生成化甲午十一月年六十有七公天性峭直議論英發無諱忌若與人寡合然其中實坦蕩雖以此遭擯斥淪落而賢士大夫推其鯁介亦以此爲兒時即能以禮自防不爲利疚自鄉薦至蓋棺四十餘年公門無私言遇有枉者輒公言之教授公嘗遺田四十畝號

生員田資諸孫以勸學自叅政公入邑庠享之而公兄弟箕裘不墜因世業焉嘗與兩兄議讓還而伯氏卒竟如議捐爲義田與族人共之其清修退讓行于家者類如此文章平正明暢得歐公典刑有集若干卷自號東麓王人學者稱東麓先生云

南京太常寺少卿麟洲王公世懋墓志銘

王錫爵

嗚呼此故太常少卿王公之墓也公名世懋字敬美父大司馬嘗命之曰吾聞東海有鳳麟洲爾庶幾埒而兄乎置其讀書之室曰麟洲已而慕王君公之行別置號曰墻東生宦小達思自抱損更署曰損齋然而學者稱麟洲先生如故王之先自卽丘子覽而下世有聞人至五季而有諱仁編者爲吳越王鎮海節度衙推官嚴之分水曾孫縉爲宋左司諫六傳至夢聲爲崑山州學正卽其官家焉崑山後割隸太倉州

遂爲太倉州人祖倬歷官至南京兵部尚書爲弘治
正德間名臣父忬歷官至南京都察院右都御史總
督薊遼軍務贈兵部尚書爲嘉靖名臣妣郁太恭人
公少慧有英氣應對機警鋒出甫十齡而病瘵大司
馬憐之不欲強以咕嗶乃公頓益苦私習爲文章其
師愧歎以不如自解去以補國子生中戊午順天鄉
試已未舉會試 賜同進士出身肄事兵部當是時
公父大司馬在薊遼虜方深入而相嚴欲以是中之
逮下獄公與兄鳳洲公欲上書請代而大司馬聞而
止之曰 上怒方熾是沃之膏也好速我死遂不果

上明年庚申大司馬竟不免公兄弟扶喪歸廬慕之
側朝夕哀奠啜粥茹素太恭人憐其瘠而手和肉美
畀之弗食也比三年除服猶被白袷單衣不敢與宴
會聽音樂惟於詩酒夙所嗜以自陶寫而已時鳳洲
公業爲海內詞宗而其同社友李于鱗汪伯玉諸公
皆有盛名當世公最後出與倡酬諸公輒大驚賞呼
之小美會 莊皇帝登極公兄弟於是伏 闕上書
辭大司馬寃久而乃白又會南省臺以公兄弟薦太
宰同欲俱起之公乃奉太恭人命謁吏部選中途而
報除南京禮部儀制司主事南曹事簡公得以其暇

肆力於文文益工居無何以郎中薨病攝曹事而魏國公之事起魏公者老而無嫡子其長子邦瑞弗愛愛嬖姬鄭之子邦寧會夫人薨夤緣請於上以鄭繼封且謀爲邦寧奪長地會有旨悉按錄諸勲胄當襲者入國子習禮魏公猝急畏公議遂以邦瑞應時少宰林濂領部喜而謂公中山王之德遠矣能庇其後人不違禮而諸爲徐氏居間者大失望乃紹祭酒姜公曰邦瑞強年矣而始不稱胄子者何以邦寧故也且邦寧不爲嫡而何以母拜天子詰稱夫人姜公疑未決而迈之儀曹儀曹復迈之魏國魏國乃

以二子俱請林公甚恨之然無以難也公乃移書都督幕曰鄭夫人固妾也其應封與否非所敢論第邦寧之生在未封前則均庶也而邦瑞爲長何兩請之有林公大喜卒從公後邦瑞卒爲嗣魏國鐫祿諸居間者絀祭酒亦坐註誤罷而後以無貺白都人至今稱王儀曹不訛法也居歲餘遷北儀曹員外郎檢緝宗牒詳謹無害會以太恭人病請告歸至池河聞計以不及待疾哭數絕而薨癸酉服除補祠曹尋遷尚寶丞會傳劉二御史上疏言事觸江陵大相怒下獄公與大理卿石公爲傳治裝爲劉營救以是失大相

百方奉 命弔祭秦藩遷江西參議治南康公端潔
懼不免乃精心訊牒勤職業而御史因挾與俱之九
江饒州時分巡者未至一切以委公公未嘗習爲及
其治之輒精於是御史以爲材而異之尋入賀 萬
壽還遷其省副使理驛傳驛傳在江右最繁官其地
者顧毀譽不能有所損而會時政裁抑冒濫則又奉
行過當至學官有徒步出入者公爲令下諸郡縣表
其平上之臺臺著爲令已結司策及署分巡道當者
會至繁假公于吏事益習有所剴割曲當理情即老
吏莫敢措手尋監秋貳冬入計南昌令者以進士任

可五載矣始用小苛辦得上官意屢登薦書以是益
驕橫直凌司府莫敢誰何公盡發其奸而去之時藩
司之從事者新不能有所悉亦一以屬公富省臺大
會方岳覈二千石及黃綬以下噤自瘖公獨條對侃
侃太宰嘆曰才難不其然乎今者睹練事敢言獨吾
省藩長與江右臬耳大相故知公材聞太宰語欲收
之會公感疾上書乞骸骨大相寢不奏而山東學使
者缺太宰以風公公力辭歸聞化女事而慕之以書
自通無何別去公嘗決一父子訟而父辟甚公痛杖
其子且誨之已乃命杖其父其子制匄前護請代始

釋之父子感悔如初有袁帥者好偵諸曹得其事嘆
曰三代不啻是矣移視陝西學政強就行其所條約
東明暢藻雅甲他省諸生欣得師無何而有給事中
某御史某故習余與大相忤乃上疏指摘化女事謂
余與鳳洲公譸張爲幻而留省應之至波及公紫已
報聞弗竟矣而公慨然謂身爲人師率即事弗竟何
顏復臨諸生乃移文兩臺乞骸骨而余爺家馭亦自
河南謝學政俱歸久之大相卒太宰第諸道學使此
兩人俱上考尋起公督浙江學政辭不赴甲申冬復
起督福建學政鳳洲公謂公可以出矣余處子又處

無乃偃蹇 天子之命而傷地下心于是公勉而之
任時大試期迫八閩故材數一邑待試無慮萬人而
其鄉薦紳所在雲集意皆有所望公一切謝却之專
心閱卷甫三月畢事所升汰皆服人進其省左叅政
分守福興道入賀 萬壽於道報遷今官居金陵雖
甚適少事特不勝士大夫筆硯之請戶履如錯遺余
書讀古人生我名者殺我身之句意色愀然然而無
以絕也性喜山水且欲盡遊諸名勝補昔遊所未足
緒成一家言而公業以勞損成病火灼于喉寢食爲
減乃移狀於卿沈爲具疏請下吏部極稱公賢姑予

告治病病痊有司奏起用如六卿例報可遂歸里第
明年四月手書析產遺戒多理身齊家要語檢理身
後事喪禮爲儉令它人積日計之弗及也曰吾自今
端坐以俟期而已屬歲大侵餓殍盈道公乃倡諸大
姓行糴粥全活可萬計死者浮屠法濟之沾沾喜曰
吾胸中更無事矣然尚矻矻著述有澹思子望崖內
外篇經子臆解其課子姓爲諸生較藝不息而性稍
卞善恚將百日病復大作二日而粒絕又二日辰興
命移席中堂強起坐飲少水亭午呼楮墨手書一紙
與鳳洲公訣大槩謂種種證俱現恐在旦夕弟性

敏有膽決加以學力定力遂能輕死破恋六親既以
無情即見兄如不見也末復謂天下雖存錄 聖主
能獨服事尚可爲惟願 廟堂勿固寵勿近小人勿
聽人言搜人過諸君勿偏見勿立黨勿思報復即死
無憾既緘書未發迫與自力起使人掖而據胡床盥
手與足既畢諸子問有言否曰四月書已盡之復何
言不昏散否曰無念何所昏散翛然遂逝公以嘉靖
丙申生歿于萬曆戊子春秋五十有三耳平生孝友
重名義其施予稍裁而能不失居恒不輕爲公府居
間間有之必宗戚之困阨不平者若州里之利弊不

能控者嗜義若渴有所聞汲汲行之遠識長慮悠然
能見事後少亦微有耳目之好觸一語立斷遣之居
官好爲條教煩不至瑣尤能曲暢物情因事爲功好
提獎屬吏即不至職濫未嘗不弘揜覆以故多感之
少而通易晚視學政旁通諸經皆能撮其大要亦喜
讀二氏書但謂吾于兩廡饗亡所貪苟陰用其實而
陽詆其名或假竊其似而自文其陋者俱耻之以故
望崖編諸書要皆其中精至語識者謂不下白香山
晁文元也其詩文繼鳳洲公而起世以比宋之二蘇
所著詩文集共得五十餘卷其閩部三郡圖說窺天

外乘二百委談學國雜疏前已行人間

獻徵錄七十卷終